

ርኢሰ ኢሳይያስ አፈወርቂ እት ሰዑድዮ ዝያረት ረስምየት ውዳ

ርኢሰ ኢሳይያስ አፈወርቂ፡ መልክ ሰዑድዮ ሳልማን ቢን ዓብዱልዓዚዝ እበ ወደየ እሉ ዐዙመት፡ እተ መምለከት ናይ ሰለስ አምዕል ዝያረት እግል ሊዱ፡ 17 ፌብሩዌሪ ሳፈረ።

ርኢሰ ኢሳይያስ ወምሰሉ ለገሰ ወፍድ ኤራትርዮ፡ እት ርያድ ዲብ እድንያይ መጣር መልክ ኻልድ ዶል ትከራ፡ አሚር ፊደሰል ቢን በንደር ቢን ዐብደልዐዚዝ- ካክም አቅሊም ርያድ፡ አሚር ፊደሰል ቢን ዐብደል ዐዚዝ ቢ ዐያፍ- ከንቴባይ አቅሊም ርያድ፡ ዶ/ር ዐሳም ቢን ሰዐድ ቢን ሰዒድ - ወዘር ደውለት ወዕዱ መጅልስ ውዘረኢ ለልትረከቦ እቶም ለዓልያም ሱብ ሰልጠት ትክበተዎም።

መልክ ሰዑድዮ ሰልማን ቢን ዐብዱልዓዚዝ ማሌ ለሀ ዲብ ርያድ እተ ሀለ ዱዋን ሕኩመት፡ እግል ርኢሰ ኢሳይያስ አፍወርቂ፡ ወምሰሉ ለሳፈረ ወፍድ ከብቴ ናይረት ወደ እግሉ።

ክልኦት ለሚርሐት ዲበ ወደዉ ህድግ፡ መልክ ሰልማን ተእሪካይት

ዕላቀት ኤራትርዮ ወሰዑድዮ ወናይ ሕበር መሳልሕ እንዴ ዘከራ፡ ዐዱ ዕላቀት ክልኡ ለጀሀት እግል ተእደቅብ ዱሊት ክምተ ኣከደ።

መልክ ሰልማን እብ ተውሳክ፡ ዶር ኤራትርዮ ዲብ ሰላም ወመዓወነት መንጠቀት ቀር አፍሪቀ ወበሐር ቀየሕ ሐመደ።

ርኢሰ ኢሳይያስ እብ ጀሀቴ፡ ምስንዮት ወተአደድ መልክ ሰልማን ወሰዑድዮ እግል ኤራትርዮ እንዴ ሐመደ፡ ሰዑድዮ ወድወል መንጠቀት፡ አወላይት መስኡልየት ሰላም ወዐቦት ናይለ ድዋር ከም በን ሸርሐ እግሉ።

እተ ህድግ እብ ጀሀት ኤራትርዮ ወዘር ካርጅየት አሰይድ ዐስማን ሳልሕ ወንምያይ ርኢሰ አሰይድ የማኔ ገብረኣብ፡ እብ ጀሀት ሰዑድዮ ህይ፡ ወዘር ካርጅየት ፊደሰል ቢን ፋርሓን፡ ወዘር ደውለት ወንፈር መጅልስ ውዘራእ አሚር ቱርኪ ቢን መሐመድ ቢን ፍሃድ ወሰፊር ሰዑድዮ ዲብ ኤራትርዮ ሰቐር ሱለይማን ኣልቐረሽ፡ ለልትረከቦ እቶም ውቁላም ሰብ-ሰልጠት ኣድራም ዐለው።



መሸርዕ ታየኖት ወሐፊር አዱሊስ፡ ኣሳር ሐዲስ ረክብ



እብ ኤራትርዮን ውውላድ ኻርጅ መኤምረት ልትሰርገል ለህለ ታየኖት ወሐፊር ለሸምል ‘መሸርዕ አዱሊስ’ ሰኒ ልትሰርገል ክምሰል ህለ፡ እት መፈወድየት ዓዳት ወርያደት ኤራትርዮ መስኡል ፈሬዕ ወተውሲቅ ውርስ ኣሳር ዶ/ር ጸጋይ መዲን ሐበረ።

ምን ዮም 17 ጃንዋሪ ኣሰክ 13 ፌብሩዌሪ 2020 እተ ናይ በዲር ሚኒት ለገአ ወራታት ታየኖት፡ ሐፊር ወኣትሳናይ ሐቀለ ተመ፡ ዶ/ር ጸጋይ እግል ኤሬን እተ ሀበዩ ሐብረ፡ እበ

ልትረከብ ለህለ ኣሳር፡ ናይ በዲር ሚኒት አዱሊስ አህምየተ እብ ደረጀት ወጠን ወዐለም እት ትዘይድ ክምሰል መጽኦት ሸርሐ።

ሚኒት አዱሊስ እበ ዐለት እተ ሸክል እዳረት፡ እብ እቅትሳድ እት ርሸመት ዐቦት ባጽሐት ክምሰል ዐለት፡ ክምስለሁም ምስለ እት ድዋራትን ለዐለት ሐዳረት ዕላቀት ትርድት ክምሰል ዐለት እለ ለሐበረ ዶ/ር ጸጋይ፡ እት ሐንቴ መምለከት ኣክሱም ክም ኢዐለት እብ እሰባታት ክም ተኣከዳመ አፍሀመ።

እብ ኻሰሰል ድፍን ለህሉት ወእት ከርስ ለህለ ምስጢር እግል አመርት ወቅት ወጅህድ ክምሰል ለኣትሐዜ እት ወድሕ ህይ፡ መጥ-መጦርለ ወራታት ታየኖት ወሐፊር፡ ምን ወሐይዝ እግል ትድሐን ጅህድ ገብእ ክም ህለ ሐበረ።

“ሚኒት አዱሊስ ወጠንያይ ውርስ ሌጠ እንዴ ኢትገብእ፡ እድንያይ ውርስ ተ” ለትቤ መመቅረኣይት ናይለ መሸርዕ ፕሮፌሰር ሳሬን ማሌ፡ ለመሸርዕ እት ሰነት 2011 ምን ለኣትብት ወሐር እተ ወራት ትሻርክ ክም ህሉት ወዲብ ክል ሐል ለተኣትናይት ፍገሪት ትትረከብ ክምሰል ህሉት ወደሐት።

እተ መሸርዕ ሻርኮ ለህለው መኤምረት ኤራትርዮን ሸባብመ፡ ለኣሉ ደርሰው እብ ፍዕል እግል ልሸቀው እብ ምን ኣንበተው ፋርሓም ክምቶም እት ሸርሐ፡ ምስጢርለ ሚኒት እግል ለኣምሮ እብ መትሰባል እግል ልክደም ክምቱ ኣከደው።

ለበርናምጅ፡ እብ መዓወነት ወኣትመቃርሐት መፈወድየት ዓዳት ወርያደት ኤራትርዮ፡ ውላድ ኢጣልየ

ሰብ-ሸርክት፡ መትሐፍ ወጠኒ ኣቅሊም ቅብለት በሐር ቀየሕ፡ እዳራት ኣቅሊም ወሙዴርየት ፎር፡ ክምሰልሁም ሰነን አፍታ ወዘላቱ ልትሰርገል ለህለ።

ለሚኒት ገዲመት ዝያድ 3,000 ሰነት ለኣዶረት ሐዳረት ክምሰል ዐለት እተ ለኣሳረ ኣከደት ክምቱ ለሐበረ። መስኡል መትሐፍ ኣቅሊም ቅብለት በሐር ቀየሕ ኣሰይድ ዮውሃንስ ገብረእየሱሱ፡ ለመባኒ ኣካፍት ዕባደት፡ ሰናቲም ምሉክ፡ መቃብር ወድ አዳም ውብዕድ ለልትረከብ እቱ ኣሳር፡ አዱሊስ መርከዝ ተጃረት፡ ዲን፡ ዓዳት፡ ተጠውር ዲፕሎማሰየት ወዐስከርየት ክምሰል ዐለት ለለኣርኤ ክምቱ ወደሐ።

እተ ድዋራት “መዲኒት ዐባይ ድፍን እግል ትግበእ ትቀድር” ለልብል ሕፍዝ፡ ዋዴሕ እት ገብእ መጽእ ክምሰል ህለ፡ እትሊ ወክድ እሊ፡ አዱሊስ እት 7^{ኛት} መርሐለት ሐፊር ክም ህሉት፡ እበ ሐፊር ምን 500 ኣሰክ 1000 ሰነት ዓማር ለቡ ኣሳር ሰበት ትረከቤ፡ ለሐፊር እግል ልተላሌ መንገእት ለለኣርሔ ክምቱ ኣሰይድ ዮውሃንስ አፍሀመ።

እት ያንጉስ ድዋራት ዶጎሊ ምን 27 ኣሰክ 28 ሚልዮን ሰነት ለቡ ኣሰር ኣርወሕ ሐርማዝ እብ ደረጀት ዐለም እት መጃል ሕፍዝ ሐርማዝ ዶር ዐቢ ለኣገዴ ክምሰል ህለ ለሸርሐ ኣሰይድ ዮውሃንስ፡ እት ቡዩ ዝያድ ኦሮ ሚልዮን ሰነት ለኣዶረት ሐግነት ወድ አዳም፡ 800 ኣልፍ ሰነት ለወደ ሐዲስ ኣሳር ወድ አዳም ክም ትረከቤ፡ እት ሰነት 1994 ለገአ ሕፍዝ ህይ እት መጃላት ዕለም ወድ አዳም፡ ኣርድ ወተቅዩር ጀው ለህለ ፈሀም እት ረሸዶት ሙሁም ክምቱ ሐበረ።

እምበል እሊ እት ጀዛይር ደህኣክ ለትረከብ መክቱብ ኩፊ፡ እት ብለቅ እንዴ ትወቀረ ለትሸቀ 365 ዴላ፡ ክምሰልሁም እት ቀበት መዲኒት ባጽዕ ለህለ መትሐፍ ክሱት ናይ በዲር መብእ፡ ለብዕድ ኣርዛቅ ናይለ ኣቅሊም ክምቶም ኣሰይድ ዮውሃንስ ገብረየሱስ አፍሀመ።

እት ሐድ 40 ሄክታር ለትቤት ናይ በዲር ሚኒት አዱሊስ፡ ምን ሚኒት ባጽዕ እብ እንክር ግብለታይ ምፍጋር ጸሓይ ሐድ 60 ኪሎ ምትር ትረይም።

ሰነይ፡ እት ተዕሊም ለልትዐገሎ በዝሐ

እት ምዴርየት ሰነይ፡ እብ ለትፈናተ መስምስ ምን ዐግሎ ተዕሊም ራይማም ለዐለው 8,356 ምን 05 ኣሰክ 15 ሰነት ለዓማርም ኣጀኒት፡ ዮም ዓመት እበ ገአ ጅህድ፡ ለ40% ተዕሊም ክም ኣንበተው፡ መስኡል ተዕሊም እተ ምዴርየት

መምህር ሱራፊኤል ክፍሌገርግሸ ሐበረ።

ለበዝሐው ምን ዐግሎ ተዕሊም ራይማም ለዐለው፡ ምን እዳራት ደዋይሕ ፋንኩ፡ ዐለግድር ወመዐደይ ጋሽ ለልትረከብ ዐዶታት ለነብር ክምቶም ለሐበረ መምህር ሱራፊኤል፡

እብ ደረጀት ምዴርየት ለትከወነት ልጅነት እትለ ሰነት እለ እት ሸዐብ እበ ወዴቱ ኣትፋዘዶት ክምቱ ወለጅህድ ክም ለኣተላሌ ሸርሐ።

መሻረከት ኣዋልድ ኣንሳት እትለ ሰነት እለ 44% ባጽሐት ክምሰል ህሉት፡ እት ገሌ ድዋራት ለትትርኤ

መሻረከት ድህርት እግል ትትወቀል ህይ ልትከደም ክም ህለ፡ ዶር ዋልዴን ህይ ሰኒ ምህም ክም ቱ ለመምህር ኣትፋቀደ።

ፍገሪት ደረሰ እት እምተሓን 8^ይ ወ12 ፈሰል ለለኣትናይት ክም ቱ፡ እሊ ህይ ተኣምርተ ናይ እለ ትሰጀል

ለህሉት ዐቦት ክምቱ እት ሸርሕ፡ ዶር ደረሰ፡ ዋልዴን ወሙደርሲን እግል ሊዚድ ትፋን።

እት ምዴርየት ሰነይ፡ እት 31 መድረሰት 21,600 ደረሳይ ክምሰል ህለው፡ ወሳእቅ ናይለ ምዴርየት ለአፍሀም።

መቃብለት ርኢስ ኢሰያስ አፍወርቂ

2^ይ ክፋል

ርኢስ ኢሰያስ አፍወርቂ እብ ክሰሉሉ ሓድሮ ተዋልል ዐድነ ወመንጠቀትኩም ምስል ዔማት ኣክብር ዐድ ምነ ወደየ መቃብለት፡ ቴለል ተጠውራት ድወል መንጠቀትን ለኸሰሰ ጽበጠ ልተላሌ።

ሰኣል= ሓይሰ ርኢስ ዲብ ሓድረት ሓላት ሶዳን እግል ንትዐዲ። ክምሰለ ናይ ኢትዮጵያ ዲብ ሶዳንመ ተቅደራት ጋብእ ሀለ። ምን ሐረሰ እሊ እት ፍንጌ ሕኩመት ኤረትርዮ ወመትዐደዩት ሕኩመት ሶዳን መፋህማት ገብእ ጸንሐ። ከሶዳን እትሚ ደረጀት ትትረኩብ፤ እብ ደረጀት መንጠቀት ሐዳስ መርሐላት ሰላም ወመዓወት እግል ተሀሌ እተ ገብእ ለሀሊ ጅህድ ሀዩ። ተረት ሶዳን ከኣፎ ትትረኢ፤

በሊሰ= ለሓልፈ ታሪክ እንዴ ኣዘምነ ምነ፡ እትለ መንጠቀት ምን ቅሩብ ለትከሰነ ወለተምትመነ ለዐቢት ሓላት ሶዳን ወኢትዮጵያተ። ለፍንቲቲ፡ ለዲብ ኢትዮጵያ ንትሃጌበ ለጸነሕነ ሓድረት ሓላት፡ ዲብ ሶዳን እብ ገጽ ብዕድ እንርእየ። ለሓላት ምን ሕድ ለትረይም እግል ትግብእ ኢትቀድር ላኪን፡ ገባይል እለ መንጠቀት ምን ኣየ መጽአ ወእብ ከኣፎ እትለ ደረጀት እለ በጽሐ፡ ሓላትነ ወሓላት ሶዳን እብ ከኣፎ ልትራክብ፤ እግል ኒበል እንቀድር። ዲብ ሕምሳታት፡ ሰሳታት፡

ሰብዓታት ወሰማንያታት ሐር እግል ነዐቅብል ብነ። ከሄራርነ ምን መደት ቅድምት ለልትመሳኔ ተ። ሶዳን ዲብ ሕምሳታት ወሰሳታት ምስል ድወል እለ መንጠቀትነ ዶል ነኣትመጣውረ፡ ለትጠወረ ዓዳት ሰያሱት ለዐለት እግል ዱለት ተ። ምን እሊ ዓዳት ወነባሪ ሰያሱት ሞውርት እለ ዲብ መደት እተሓድ ፊድራል፡ ዲብ ሰያሱት ኤረትርዮ ለዐለት እግል ተረት ቀላል ኢኮን። ዲብ መደት መትኣምባት ግድለ ታሕሪር ሸዐብ ኤረትርዮ ወተጠውራቱ ለዐለት ተረት ሶዳንመ ቅዊት ኢኮን። ከለ በሻለት ዓዳት ሰያሱት ሶዳን፡ ምን ብዕዳት ድወል እለ መንጠቀት ለትቀደመ ወለትጠውራቱ። ዲብ ወቅት ለሀይ ክም ሶዳን ሞውር ለዐለ ኣለቡ። እብ ተጠውር ኣሕዛብ ሰያሱትመ እተ ክምሰሊህ። ምናተ ሐሬ ምስል ካቲመ ሐርብ ብሩድ ሰያሱት ንዛም እስላሚ መጽአት። እለ ሰያሱት እለ ሀዩ እግል ኣብደዮትለ ዓዳት ሰያሱት ሞውርት ለመጸት ተ። ምን በሰር ዓዳት ወታሪክ ሰያሱት ሞውርት እንዴ ፈንርከ እብ ፈክርየት ንዛም እስላም መጅተማዕ እግል ትምራሕ ወጠኖት ሀዩ፡ ዲብ ሸዐብ ሶዳን ወሰያሱቲ መደረት ዐባይ ሰበቡ። ለዲብ ሰነት 1989 እብ እንግላብ ሰልጠት ለጽብጠ ንዛም ኣጅብህ ኣልእስላምየ እግል ሶዳን፡ ዲብ ኣዳም ለኢልትጸበሩ መትፈንግር ሰያሱት፡ መትካፋል፡

ክላፋት፡ ደማር እቅትሳድ፡ መትሐምራግ ኣምን ወሰላም ሸመዩ። ከለ ዲብ ሰነት 1989 ለተዐለነ እዕላናት ወለጉብኣ ረበርብ፡ እግል እትለ መንጠቀት እለ እብ ኩሉ መቃዩሰ ዐገል ሰያሱት ሞውርት ወመትቀድመት ዐለት እግል ለትትበህል ሶዳን ሐር ሰበት በልሰዩ፡ ከጠእ ሌጠ እንዴ ኢጉብእ ጀሪመት ተ። እት ቀበት እለን ለሐልፊየ ሰላሰ ሰነት ለዐለ ሄራር ግምጩይ፡ ነዐር ሰያሱት፡ ሀገጋይ እቅትሳድ፡ መደረት እጅትማዕየት፡ ሰቃፊት ወዓዳት ሚወልደ እምቤ ምን ጉብእ፡ እሊ ለትረኣ እንፍጃር መቃወመት ሸዐብ እብ ገበይ ጥልቅት ክልቀ።

ምነ ለዐበ ኣክላጥ፡ መትፈንታይ ግብለት ሶዳንቲ። ግብለት ሶዳን እግል ትትፈንቲ እቡ ለትቀድር ለጉብኣ ልግባእ ሰብብ መቅቡል ኢዐለ። ለእግል ሶዳን እት ክልኤ ዐዶታት ለከፍለ ኣፍካር ሀዩ ናይለ ለዐለ ንዛም ሰያሱት ተ። የምክን መትፈንታይ ግብለት ሶዳን ሐቅ ሸዐብቲ እግል ልትበህል ቀድር ላኪን፡ እበ መትፈንታይ ለትረከብት መስለሐት ሚተ፤ ግብለት ሶዳን ሰክበት ወኣማደደት፤ ቅብለት ሶዳን ሀዩ መስኩብት እንዴ ረክበት ረሄት፤ ክላፋት ኣክተመ ሚኢፋሉ? ምን እምብል ለበሊስ ኢፋሉ ሌጣቲ። እሊ ኣከይ ፍዕል እሊ ሀዩ ምር ምነ ዲብ ሶዳን ለጉብኣ ጀራይም ተ። ኣሰር መትፈንታይ ግብለት ሶዳን ለተለ ጀራም ሀዩ፡ ዳርፎር፡ ምፍጋር ጸሓይ፡



እንቀድር፡ ለኣኪት ዛህረት ሀዩ፡ ሶዳን መርከዝ ናይ እርሃብ ወደወ። ሕነ ሰነት 1994 ዕላቀትነ ዲብሎማሰየት እምበትክ ምነ እንዴ ሀሌ፡ ኡሳመ ቢንላድን ዲብ ሶዳን ዐለ። መርከዝ ኣልቃዕዳ ዲብ ሶዳን ዐለ። እምበል እሊመ ካርሎስ ዲብ ሶዳን ነብር ዐለ። ቦነ ሐራም ኢተርፈ፡ ዳዕሽ ኢተርፈ፡ ኣሸባባ ኢተርፍ ወብዕዳም ቅዋት እርሃብ ወደማር ኣማደደው ዲቡ። ርዝቅ ሸዐብ ሶዳን ዲብ ናይ ብሕተ መስሌሕ ትብደለ ወለዐድ እሳት ክላፋት ወደማር ለዴት ዲቡ። ምን ሐረሰ እሊ እትለ ለሐልፈ ሰነዋት ለዲብ ሶዳን ለዐለ ንዛም ወለ ዲብ ኢትዮጵያ ለዐለ ክራም ሐዳም ፈርግ ለኣለዎም ሰብ ሸርከት ዐለው። እግልነ ኣሰክ እለ መደት ቅርብት እብ ሕበር ልትሓረቡነ ዐለው። ከእትለን ለሐልፊየ 30 ሰነት ምስል ርዝቅ ወፊህም ሰያሱት ሶዳን ነኣትመጣውሩ እንዴ ሀሌ፡ ዲብ ዐድ ለኣጅረወ ደማር እቅትሳድ፡ ክላፋት ሰያሱት፡ መትፈንታይ እጅትማዕየት፡ መትሐምራግ ኣምን ወሰላም ወብዕድ ጀራይም፡ ለልትዓደሉ ኣለቡ። እለ ኣዜ ዲብ ሶዳን ለሀሌት መርሐላት መትዐደዩት፡ ክብድት ወሕቡልክት መርሐላት ተ። እሊ ኣዜ ማጽእ ለሀሊ ተቅዩር ሀዩ፡ እግል ዐድ ለለሐሰብ ወፊክር፡ ኣሕዛብ ሰያሱት ለኣምጸኣዩ ተቅዩር እንዴ ኢጉብእ፡ ጥልቅት ወድቅብት መቃወመት ሸዐብ ለክልቀቲ ተዋልል ተ። ኣዜ ዲብ መትዐደዩት መርሐላት ባጽሓም ሀለው። እለ መርሐላት መትዐደዩት ኣሰክ ኣየ እግል ተሄርር ቲ። ክምሰለ ዲብ ኢትዮጵያ ለትከለቀ ጀራይም ለዲብ ሶዳን ለትመደደ ወለትለመደ ኣከይ-መካይድ እግል ትሰዩሕ ወቅት ወጅህድ ለለሐዜቲ። እሊ ኣዜ ለሀሊ ተዋልል ሀዩ፡ እብ ገበይ ጣፍዐት ወዓድላት እንዴ መርሐክ እብ ከኣፎ ዲብ ደማንት ለበ ደረጀት ሰላም ወዐማር ክም በጹሕ እግል ልትከደምቡ። እትለ ለሀሌነ ዲብ

መደት እት ቀበት ሶዳን ለሀሊ መሻክል ናይ ሰያሱት ፈንጨጋርቲ። እሊ ሀዩ እዴ መንጠቀትመ ሀሌት ዲቡ። ሶዳን ምነ ናይ ሕሽመት መንበረ ሰበት ደርገገው፡ እተ መንበር ሕሽመተ ወዲብ እለ መንጠቀት እለ ለዐለት እግል ተረተ ዐባይ እግል ተኣቅብል ቡ። ሸዐብ ሶዳን እብ ሕርያን ብዕዳም ልትዋሌ ጸንሐ። ምን እሊ ሕርያን እሊ እንዴ ትባላሐ ወኣባረ እብ ናዩ ሰያሱት እግል ልትመረሕ ቡ። እሊ ዶል ገብእ ሕናመ እግል ንሰኩብ እንቀድር በህለት ተ። ከዲብ እለ ደረጀት እለ እግል ትትበጸሕ ሚእግል ንሰዴ ክም ብነ ዋከትነ እግል ነሀርሰ ወጅቡ። ለጸንሐት ሰያሱት ዓዳት ወነባሪ እርሃብ ወፊናታይ እት ግድፍ ግማመት እግል ትትቀበር ለኣሰትሀለ። ምን ካርጅ ልግብእ ወምን ቀብቶም፡ እሊ ኣዜ እብ ፈድል ግድለ ሸዐብ ሶዳን ለትረከበ ወዲብ ደንጎባህ ለኢበጽሐ ተቅዩር፡ ለለዐንቅፎ ወልትቃወሞ ጀሃትመ ሀለው። እሉ'መ ልጃም ለኣትሐዝዮም። ቅድየት ሶዳን ናይ ናይጃራየ ኣውመ ናይ ግብለት ኣፍሪቀ ቅድየት ኢኮን። ናይ ጎርነ ላቲ ሸዐብ ቅድየት ሰበት ጉብኣት፡ ሕነ እበ ለትትቀደረነ ምን ሰዳይት ሸዐብ ሶዳን እግል ሰላሙ ወኣምነ ሐር ለእምብል እቡ ሰብብ ኣለብነ። ለሐልፊት ክሳር ሶዳን በነ እንዴ ኢትጉብእ ሕናመ ከሰርኩ። ምስል እሉም ኣዜ ዲብ መደት መትዐደዩት ሕኩመት ሻርቲ ለሀለው ቅዋት ልግብኣ ወኣንፋር፡ ለነኣክተልፍ ዲቡ መባድእ ሰበት ኣለብነ። ዲብ ኣከዶት ኣምን፡ መዓወነት ሕበር፡ እቅትሳድ፡ እት መሳሌሕ ገባይልነ፡ ሸርከት፡ ሰያሱት፡ እጅትማዕየት ወብዕድ ለትወጅቡ እግል ነኣትምም ተ። የምክን ተፋሲሉ ኣዜ ለለኣትሐዜ ኢመሰል ዲብዬ እግልሚ ለተፋሲሉ ብዋሕ ሰበት ጉብኣ። ምስል ሶዳን ለብናተ ዕላቀት ወእትለ መንጠቀትነ ለሀሌት እግል ተረት እብ ተኣሰትህል ሰበት ነኣምር።

ዲብ ገጽ 5 ልተላሌ



እደትርዮ፡፡፡

ክል ኣርቡዕ ለትጠ'በዕ ጀሪደት

መዳልየት፡-

- መሐመድ እድሪስ
- ክልሹም መሐመድ
- ኣድም ሳልሕ
- ሳልሕ እድሪስ

ለይኣውት ወኣርተዖት

* ዘህረ ዐሊ

* ፋዋነ ኣድም

ተለፎን፡ 121797/07121322

ፋክስ፡ 127749፡፡ ዕ.ሰ.ቡ፡ 247

ተውገዕ ጀሪደት፡፡

ተለፎን፡ 200454

ኢትኣመርት፡፡

ተለፎን፡ 125013፡፡ ዕ.ሰ.ቡ፡ 1284

ኩርድፋን፡ ኒል ኣልኣዝረግ፡ ርኡይ ወሰምዕ ለኢሊኣምር መትፈናታይ ኖሶም ኣምጸኣው። ለንዛም እት ሰልጠት መጽእ እንዴ ሀለ ለኣትሳቅር እቡ ለዓለ ስቃር “ናኣኩል ምንመ ነዝራዕ ወነልበስ ምንማ ነሰናዕ!” እንዴ ትባህለ ለተኣተ ገለድ ዮም ኣየ ሀለ፤ ዮም ሐቅ 30 ሰነት ዴን ሶዳን ከምቲ፤ እንዴ ትዝመተ ካርጅ ለተዐደ ርዝቅ ሸዐብ ሶዳን ዝያድ 90 ቢልዮን ዶላርቲ ልትበህል። እሊ ኣየ ሀለ፤ ለዚምተቲ ሀዩ መን ወምንቶም ወእተየ ሀለው፤ ዲብ ደንጎበ ነብረ ተሐገለት። እቅትሳድ ኣለቡ፡ እብ ኣርዛቅ ሐርሱ መዓድን፡ ሰናዕት፡ ተዋብ ንዋይ ወብዕድ ክም ሶዳን ለተጅር ዐለ ኣለቡ። ዲብ ሶዳን እክል ተሐገለ ምን ልትበህል እብ ከኣፎ እግል ንእመን

1^ይ ክፈል

ሰፈር ለሰፈር ተሐበረዩ

ዲብ ግርቦት ሰነት 1989ቱ። አቡዬ ሕመድ ወድ ኢብራሂም ወድ ዜዳን ልትበህል። ላሊ እብ ግዲደ እት መትክራሩ ልትበለሰ ሐቆለ ትመዩ። ምሰለ ክም ዔዘረት ልትክዔ እቶም ለዐለ ብርድ ሮረ-ሐባብ። ሀመት ወሽቀላት በዐል እድንያመ ይልሰከበዩ። አክል አሕድ ተዐቡ ለኢደሌ ላቱ እብ ሰኮብ ልትበለሰ ትመዩ ወቤለዩ። አርድመ ሐቆለ ጸልመት ሐራሰ ሓለፈ። እግል ጽቤሕ ምድር አትበረሀ። ለጉበኣ መክሉቅ ህዩ እብ ጽቤሕ ምድር እት አድሕድ በሽይሩ ነድእ።

መጋዊሕ ሰራይር ጭቅ-ጭሪቅ እት ልብል። ከራክፊታት ወደወርህመ እብ ህግዩ ቆሙ እዛናቱ ወቀለ። አቡዬ ሕመድመ ምን እት ሐንቴህ ልትበለሰ ለትመዩ ሸፈቱ እንዴ ፈግረ። እግል ተሊለት ወዝክር ክርንቱ ሐሳሐሰ። ወእበ ጥዕም ክርንቱ ህዩ “ላእላህ ሀእለላህ ክሉ እምበሌከ ፋኒቱ። አላህ መዐቡድ አለህ” እት ልብል እግል ‘ተወላለብ’ ዐድ ዜዳን እግል ትሰመዕ ለትትዣት ተሊለት አሰመዐ።

እሊ ወቅት እሊ። ወልዱ መርሐም መ/እድሪስ ወድ ሕመድ። እት ናይ አቡሁ ተሊለት እንዴ ቀንጽ። ሐቆ ሰኒ ሙያም እግል አድሕድ ትበህለው እግል ምድጋ አቡሁ እግል ልኡትሳውር እንበተ። መርሐም መ/እድሪስ ወድ ሕመድ። እብ ጠቢዐቱ ሃድእ። ራውግ። ሰኒ ርሐም ረሕመቱ ዛይደት ወምሰል አዳም መካለፊት ለኢወዴቱ ለዐለ። እብሊቱ መሰለኒ። አቡዬ ሕመድ እግል መ/እድሪስ ወልዱ። “መ/እድሪስ ዘመተ አቡሁ ረሕመት ቱ” ልብሉ ለዐለ።

አዜመ ሐቆ ምጽኦት መ/እድሪስ ጽንሕ እንዴ ወደ መ/ዐሊ (ባይደ) ወድ ሕመድ መጸኢዮም። ጠቢዐት መ/ዐሊ (ባይደ) ህዩ ምን ጠቢዐት መ/እድሪስ ሰበት ትትፈንቱ። እግል አቡሁ እበ ተግባቡ እግል ልሰኦሉ አንበተ። (ባይደ) “ይበ ዮም ላሊ እንዴ እትሰክብ ትመዩከ ኖሰካቱ እንሸአላህ” ቤለዩ። እሊ ሰድ እሊ አቡዬ ሕመድ። እት ሰኦል ወልዱ ባይደ እግል ልብለሰ እት ለሐዘ። “አይወ አናመ እት ተግባብዩ ለትሰኦሌኒ ላቱ ሰኒ አሰኦሉ ቱ” ቤለዮም። ወእተ እትሩሁ ለዐለ ጋር እት እግሎም። አቡዬ ሕመድ መደቲት እት ለአስተንትን ወልትፈክር ጸንሐ ወሐር አይወ ቤለ ከከም ገሌ ርሶ ነፈር አሰቀቀቡ። አዜመ አቡዬ ሕመድ እብ ክእኒ ህግዮሁ አንበተ።

“ላመ እግልዬ ሰኮብ ካልእ ትመዩ ቴለል ካልእ ኢኮን። እለ ለእተ ህሌን ተወላለብ ዐድ ዜዳን እብ ማንነ ወገለብ። ሰብ ሓዩት ላሊ ከትት እንዴ ኢነሰኦ እብ ተሊለት ወዝክር ልትከበቶ ልትመዩው

ነበረው። ዮም ህዩ ሕናን እንዴ በትከት ትም ሌጠ ጉበኣት። ካፍህ እድንዩ ረቢ ኖሱቱ ሕይደ ወደዮም” ቤለ አቡዬ ሕመድ እግል ቀደምያም ሐው አበው ወኡበሶታቱ። እት ልሰፋለል። አዜመ መርሐም መ/እድሪስ ርሐም ሰበትቱ ለሓለት አቡሁ ወለ መትሰፍላሉ ሰበት አርሐመዩ ወሻቀለዩ። እብ ንዩት ሐጫር “ይበ ሚ ህሌት ሐዳስ ዮም እግልከ ለተሰፍልል” እት ልብል ሓለት አቡሁ እግል ልድሌ ሰኦል ቀደመ እቱ።

አቡዬ ሕመድ ክልኦት ውላዱ እት ገነሕ። እብ ክእኒ ደሚሩ በርበረ እግሎም። “አይወ” ቤለ ወሐር “እለ እድንዩ እክፊነ ሸረ ለደንገረ እት ወለ ቀደመ ክሉ ግዕዝቱ አዩ ህለው ለቀዳምያም ወአዩ ህለው ለሓይሳም” ሐቆለ ቤለዮም። “አዜመ አነ እግልዬ እትሩህ ለህለ ጋር ጋርኩም ሰበትቱ ሰኒ አተንሱኒ” ቤለዮም። ውላዱመ መርሐም መ/እድሪስ ወበይደ እግል አቡሆም ክሉላሙ እት እንቶም እግል አተንሳይ እዛዮም ወልዮም እንዴ ፈትሐው እግል ምን አፋሁ ለትፈግር ዘዐት እብ መዳሊት ጸበረው።

አቡዬ ሕመድ ውላዱ ለአተንሰዉ ክምሰል ህለው ክምሰል አግረሰ። ህቱመ ለምን ክሉ ሰኮብ ካልኡ ለዐለ ጋር ወእብ ሰዳይት ናይ ውላዱ እግል ለኡትምሙ ለሐዘ እቱ አተዮም። አቡዬ ሕመድ ምን በሐር ሸቀላት ወ ዝ ክ ር ያ ት ቀዳምያም እንዴ አቅበሉ። እግል እብ ፍንቱይ ሰኮብ ካልኡ ለዐለ ሓለት ወልዱ እግል ውላዱ

እግል ልደግም አሰተብደ።

“አይወ” ሐቆለ ቤለ “ላመ እግልዬ ሰኮብ ካልእ ለህለ እሊ ሐኩም ለእት ሱዳን ነብር ለህለ መ/ዐመር ቱ። ረአስ ነብር ሰበት ኢኮን። ዮም ህሌት ወፈጅር ይህሌኮ። አዜ እትለ እድንዩ እት አነ ምውዳቂ ሐቆ ኢርኤኮ ህዩ እለ ተአሰክብ ኢኮን ጣይ አቡኩም” እት ልብል እብ ይህዳይ መ/ዐመር ታርህ ክምሰል ህለ እግል ውላዱ ደገመ እግሎም። ውላድ አቡዬ ሕመድ መርሐም መ/እድሪስ ወሐሁ መ/ዐመር ውላድ ሐቱ ቤት ቶም። እጥም ህዩ ፋጥነ ወለት ሐመድ ትትበህል። መ/እድሪስ ምን ጥሰተ። ረሕመተ ወደፍአተ

እንዴ ኢጸግብ። ወመ/ዐመር ላቱ ወልደቱ እንዲኢኮን ሐቱሁመ እንዴ ኢደሌ። ህቱመ ላመ ግርም ግንሐተ እንዴ ኢልርኤ ለገበይ ለክሉ ገይሰ ጌሰት። እብሊ አሰባብ እሊ ህዩ ዕበያት ይትምነ ወዕበያት አብ እት አካን እም ወአብ። እንዴ ጉበኣ ዐበዮም አቡዬ ሕመድ ወድ ኢብራሂም።

እብ ፍንቱይ መ/ዐመር እግል አቡሁ ሰበት መሰል ወይትምናመ እዳሁ እት መ/ዐመር ዘይድ ሰበት ዐለት እብ ዐሰር እዳ ሸም አቡሁ እቱ ዘይድ ዐለ። አክለ ውላዱ “ይበ እግል መ/ዐመር ዝያድ ክልነ እግልሚ ትፈትዩ?” አክለ ቤለውተ ሰሕቅ እት ልብል “ውላድ ረቢ ልክሩዐ ለዐሬ እቱ እለቡ። ላኪን አነ ወ መ/ዐመር ሐቱ ለዐረምነ አድሕድ መሰል

ወ ካልእ መ እት ሕቅፍዬ ዐብዮ አነ” እት ልብል በልሰ እቶም ዐለ።

አይወ አማኑቱ አቡዬ ሕመድ። መ/ዐመር ሐቆ ርኤክ ሕመድ ቱ ትብል። ወሕመድ ረኤክ ምንጉበእመ መ/ዐመር። ላመ ዕበያት እሙ ህቱ። ወአቡሁ ህቱ ዐለ ጠበዐን። ውላድ ሕመድ ለእግል አቡሆም እትሩህ ለትመዩ

ጋር ሐቆ ሰምዐው። አክል አሕድ እግል ልበይኑ እግሎም። በይደ ወልዱ እግል አትአከዶት ሰኦል ተውዲሕ ትሰእለዩ “ይበ እብሊ ይህዳይ መ/ዐመር ሐቱ ላቱ ክሉ ኢትትረህ ወኢትትሸቀል” ቤለዩ አቡዬ ሕመድመ እብክእኒ በልሰ እቱ።

“መሸቀለቼ እብ መትነዳቅ መ/ዐመር ኢወሐደ። ደለ እግል እሊት

ግሰክዉ ህዩ ወልከ በዲቱ ወልከ ዐዋሌናይቱ ወልከ በዲ ምንዲ ኢጉበእ እት ገሌ ሞ ኢትረኦ ለልብል ለጉበእ ወለ ኢጉበእ መሰምሰ ለአቀርቦ እግልዬ ዐለው። አዜ ህዩ እሊ ወልለ አቡኩም አብር ወድ ሐምድ ወድ ዜዳን ወለቱ አምነ ሐጽያም እግሉ ህሌን። አዜ ምን ምንኩም አነ ውህር እንዴ ቤለ ከእብ ሐሁ መጽእ?” ቤለዮም። እሊ ወክድ እሊ መ/እድሪስ እንዴ ኢበልሰ መ/ዐሊ (በይደ) እንዴ ቀንጽ። “ይበ አሰልፍ አምጽኦት ሐቱ እቼ ህለ። ወላመ አዳም ልብሉ ለህለ ወድ አዳም በህል ወፈዐል ወትረክ። በዲሩ ምሰሉ ትክለቀ። ላመ ወልከ ባዲቱ ወዐዋሌናይቱ ልብሉ ለህለው አክል መ/ዐመር ለኢወዱ ወለ ኢለደውሮ ሰበት ቶም ብዙሕ እብሊ ኢትትሸቀል ወኢትትረህ” እት ልብል እግል አቡሁ አትሀደኦ።

አቡዬ ሕመድ ሐቆ መባልሰ መ/ዐሊ በይደ ሰምዐ በኑ ሳክብ እት እንቱ። “ግድም ዕምርኩም ልትጠወል ወምራድኩም ውላድኩም ለአምረ እግልኩም። ኖሱ ለሰነት ዮም ዓመት ቀጣን ህሌት እንዲኮን አናዲ ለቤቱ ምን እርኤ ለጋንዬ እክል አድሕድ ወሰክበ እግልዬ” ቤለዮም።

እሊ እት ደነግብ ሰነት 1989 ሰበት ጉበኣ ሰነት 1990 ክምሰለ አቡዬ ሕመድ ለቤለዩ ሸልሕት ዐለት። ህዳይ እግል ትውዴ ኢኮን እበ ምሰልካመ ለህለ ዐዋኢል ያለጠፍ አበለት። አቡዬ ሕመድ መባልሰ ባይደ ወልዱ ክምሰል ሰምዐ እብ ክእኒ ለመሰል በልሰ እቱ። “አይወ እት ሙብህለ አዳም ክምሰለ በይደ ቤለዩ ምን ተሐይሱ ረቅበከ ወምንዲ ተሐምቁ ቀበኩ።

ብሃል ወመትበሃል ህዩ በዲር ምሰልነ ትክለቀ ወአዜመ ምሰልነ ህለ። ሐዳስ እት መ/ዐመር መጽኦት ህሌት አለቡ። አዜ አነ ህዩ ሐቆ ክልኦት እንቱም እለ ትብው። ጋንዬ ሰክብ ምኑ ህለ ሌጠ” ቤለዮም። ወእግል እትሩሁ ለዐለ ጋር እት ረአሶም ከረዩ ምኑ።ላመ እግል መ/ዐመር ሕጺት ለዐለት አምነ አብር እት ወቅት ለህይ ሓምሳይ ፈሰል ትደርስ ዐለት። ሸምብሬበት እብ ቅንጽተ እት እንታቱ አቡዬ ሕመድ ትምኔቱ ለኢተአተምም አምዕል ጠበሸ ለትቤ።

ሐቆ ሐቱ ሰነት ለቴለል ትቀየረ። ተወላለብ ህዩ ምር በዐል ገጽ ሳረሐት። ለሰኔት ውላዱ ልተምኔ ወልሰኤ ለዐለ አቡዬ ሕመድ እድንዩ ግረሁ እንዴ ሐድንዩ አሰር ቀዳምያም ወለ ሰንያም። ምን

ዳር እድንዩ እሰክ ዳር አልክረ ቀደመ። አክፊነ ሸረ እድንዩ ህዩ እት ውሉድ እትርሕም ወእት ዋልዳይ ክል ምርት ከእብ አምዕሉ ተሐድሩ። ህቱመ ምን ሞት ይቁን ሰበት ዐለ እብ መትነዳቅ ወልዱ ተርህ ለዐለ። ጀነት ወረሕመት ተአትባርዱ።

እት ሰነት 1990 ሸዐብ ኤረትርዩ ግድለ ጀሐር ወአከይ መንበረት ሓለፈ። እት ሰነት 1991 ህዩ እግል ወቅት ረዩም ለአትበገሰዩ ግድለ ክፈሕ መሰለሕ እብ ሕርዩት ወእስትቅላል ትበሸረ። ወእብሊ ህዩ በዐል ሰያደት ወጠን ጉበኣ። መ/ዐመር ሕመድ ሐቆ ይትምነ እም እት ንእሹ። አቡዬ ሕመድ እት ክል ክትፈቱ ለደውሩ እንዴ ዐለ። በጸሕ ሸንጉል ክምሰል ጉበኣ። እብ ድራሰት ረክብ ወሸቁል እሰክ ሱዳን ጌሰ። ዲብ ሱዳን እት ምር ሐይ ሀደንደወ ለበዝሐው እቱ ሳክን ሰበት ዐለ ህዩ ተርብዮቱ ወንሸኦቱ ወሰብ እምሩ ህቶም ጉበኣው። እብሊቱ ህዩ መ/ዐመር እብ ክሉ ሓለቱ እናሰ ሕዳረባይ አተበሉ። ህግዮሁ ወለመዱ ናይ ብዳዌት ሌጠ ጉበኣ። ወእብሊ አሰባብ እሊ እንዴ ኢጉበኣ ኢተርፍ ላመ አዳሙ። ወልከ ዐዋሌናይቱ ልብሉ ለዐለው እግል አቡዬ ሕመድ። እት ሰነት 1995 መ/ዐሊ በይደ ጎማቱ ምሰል ሐው እንዴ አትመመ። ፊነ አቡሆም እትርህቶም ሰበት ዐለት እሰክ ሱዳን አሰኦኑ ዋጪለ።

መ/ዐመር ቴለል ህዳይ ዳልሁ ሰበት ዐለ መዳሊቱ እግል ህዳይ እንዴ አትመመ ጸንሐዩ። ህቱ ወሐሁ ህዩ ምሰል ተለው ወደው። ወእብሊ እት ቀደም ሰነት 1995 -1996 ለእግል ብዙሕ ወቅት መትነዳቁ ሰኮብ ካልኦም ለዐለ መ/ዐመር ወድ ሕመድ እት እንክር ድማን ዐድ ሐሁ በይደ ለጸዕደ ቤት ትነደቀት። ወእብ ደሚሮም “ግድም ይበ ለፊናክ እት ፍዕል አውዐልነህ ሰክብ ምኒነ ወቅሰን” ቤለው። መ/ዐመርመ ወለ እግል ሃዲ ለዐለ አምነ አብር እምበል ሞላድ ሐቱ አምር አድሕድ ይዐለ እግሎም። ክልኦት ጋሽይ እት እንቶም እት ጋሽይት ቤት ተሐበረው። እብ አድሕድ እግል ልሒሶ ወነሐር አድሕድ እግል ልብልዮ ናይ ክል ምናም ትምኔት ጉበኣት።

እለ አምዕል እለ ህዩ ክሉ ፈታዮም ወአዳሞም እበ ሰነት ደሐረ ወተምነ እግሎም። “ጽምድ ውቱድ ወረአስ ሕጡዋ። እንተ እብ ማል ወህተ እብ ዕያል። ወክሉ ለረአዩ ወለሰምዐዩ ለሒሶ እቡ። ” ለልብል መድሐር ክሉ እተ ህዳይ ለመጽኦ ለአትደወረን ወዐለ ወትመዩ። ላመ ክልኦት ሰብ ሸርከት ሐያት እብ አማነት ወሕሸመት አድሕድ ከበተው። ሚዛን ፈታሆም ወትምኔቶም እብ ሰነት እክል አድሕድ ዐለ። ክልኦት እት እንቶም ለአተወ ቤት እብ ምርት ደሚር ወልብ ምንዲ አተሐደው ክምሰል ማይ ወሐሊብ ተሐበረው።

ትተላሌ.....

ምስውር፡ ሳሌሕ ዐብደልቃድር

ሐሺሻይ፡ እት መትከምካም ወተጠውር

ሐሺሻይ፡ ሐቲ ምንሰ 15 እዳራት ደዋዬሕ ምዴርየት ሐጋት እት ገብእ፡ ምን መዲነት ሐጋት እንክር ቅብለት ምውዳቅ ጸሓይ እት መሳራት 17 ኪሎምትር ራይመት ህሌት። ሸዐበ እብ ርዕዮ ወሐርስ ለልትናበር ሸዐብ ቱ። ቀደም ሕርየት እት ለትፈናተ ደገጊት ወአድሁይ ፍንጡር ለዐለ ሸዐብል ዳሕየት፡ ምን ሰነት 1994 አስክ አዜ ዲብ ጋድም ሐሺሻይ እንዴ ሐድረ፡ ምን ወክድ እት ወክድ ክዳማት እት ልትወሰክ እሉ፡ ዮመቲ እት ሸብህ መዲነት ሓድር ህለ።

ሐሺሻይ እብ ምፍጋር ጸሓይ ምስል ምዴርየት ሐመልማሎ፡ እብ ግብለት ምስል ሐጋት፡ እብ ቅብለት ምስል ሐልሐል፡ ቅብለት ምውዳቅ ጸሓይ ምስል አስማ፡ እብ ምውዳቅ ጸሓይ ህይ ምስል ዐደርዴ ናይ ምዴርየት አቁርደት (ጋሽብርክ) ትትሓደድ።

ምን ክዳማትመ ምን መትከሳሰለ ዳሕየት እንዴ አንበተው፡ እሰልፍ ጽርግዩ፡ መድረሰት፡ ደርባመ ዕያደት ወዴማት ማይ እንዴ ትቡን እሎም፡ እትሊ ወክድ ጎነ ዲብ ሓለት ተጠውር ወሐዳረት ልትዐዴ ለህለ ሸዐብ ቱ። እት ወሬሕ አክቶበር 2019፡ ሰሕፍዩን ምን አርበዕ ጀራይድ ኤረትርዩ እት ዳሕየት ባጽሓም ዐልነ። ከምስል እዳሪል ዳሕየት አሰይድ መሐመድ መሰሳ ሓምድ ለወዴናህ መቃብለት፡ እንዴ ተሌት ትትቀደም፡

ሰኣል፡ እለ ዳሕየት ምን እሰምዎ ደገጊት ቄመት ወሸዐበ አክል አዩ ገብእ?

በሊሱ፡ ዳሕየት ሐሺሻይ በዲር ሸንጊ፡ ጎንዩ ወሐሺሻይ ለልትባህል ደገጊት እቱ ትትናበር ዐለት። አዜ እትሊ ጋድም ሐሺሻይ ክምኩማም ህለው። 1800 ቤት ለህልዩ ዲብ ህለዩ፡ ለሸዐብ 15 አልፍ ገብእ። እሊ ሸዐብ እሊ ቀደም እለ 15 ድጌ ዲቦም ፍንጡር ለዐላ ቱ፡ ሐቀህ ሕኩመት እት ሐሺሻይ እግል ልትከምካም ክም ሰምሐት፡ ምን መንበረት ርዕዮ ወሐርስ እት መስከብ ሳብት ኣቲ ህለ።

ሰኣል፡ ሐቀ መትከምካም ሚ ክዳማት ገብእ እግልኩም ወአዜ ከአፎ ህለ?

በሊሱ፡ እብ ፈድለ መትከምካም ህይ ምን ረውደት አስክ 8ይ ፈሰል ለትአደርስ መድረሰት፡ ክምስልሁመ ዕያደት ወክዳማት ማይ ራክባም ህለው። ዮም ዓመት እበ ዘልመ ዘሃይፍ ለትሓበረዩ ዘላይም፡ ለዕያደት፡ እግል ሐራሳት ሸቄይ ዲበ ለዐለ ሰከን መታብዐት፡ ዚንጎሁ ትገለ ምን። እት ክዳማት ማይ ከማን፡ ድራል ወመቶር ምንመ ህለ፡ ለመቶር ገዳም ወዐነድኛ ምን ሰነት 1994 አስክ አዜ ሐን ምድር ሰበት ጸንሐ፡ አበረ ከልትናቀዕ ህለ፡ ወእብሊ ለማይ እግለ ብዝሐላ ዓይላት ካፊ ኢኮን ድኢኮን፡



ለክጡጡ ምን ገብእ ወኣላቱ ደሐን ቱ።

ሰኣል፡ እት ምህር አጀኒት እለ ዳሕየት ከአፎ ገይሶ ህለው?

በሊሱ፡ አጀኒት ደርስ ህለ። አስክ ሳምናይ ግሩም ገይሶ ህለው። ለምሽክለት ሐቆ ሳምናይ፡ እትለ ባክነ ካልኣይት ደረጀት እግል ኢንክሰት፡ ለውዛረት ተዕሊም ትጠልቡ ዐደድ ደረሰ ነኣተምሙ ኢገብአን፡ እት አርድ ብዕድ እንዴ አጀረ ለልአደርስ ሸዐብ እግል ኢልግበእ፡ ቅድረቱ አለቦም። ሰበት እሊ እግል 2ይት ደረጀት አጀኒትነ አስክ ቦርዲን አቁርደት ነሓልፍ ህሌ፡ እትሊ ለልትአዘዩ ወድራሰተን ለልአትካርመ አንሳት ህይ ብዝሓት ተን።

ሰኣል፡ መዋሰላት ወጽርግያሁ ከአፎ እንቴም?

በሊሱ፡ ምን ሐጋት አስክ ሐሺሻይ ከዋ መዋሰላት ህለ። ለመካይን ናይ ብሕቶት ሰበት ቱ፡ 30 ነቅፈ እት ነፈር ነወል ነስኦ ምን። እሊ ህይ ቃሊ ቱ፡ ምናተ ለገበይ ደሐን ቱ፡ መብዝሐ እት ምድር ጣፌሕ ሰበት ትሄርር፡ አኪትመ ምን ገብእ እብ ቀላል እግል ተኣትሳንዩ ትቀድር።

ሰኣል፡ እትሳላት ህይ?

በሊሱ፡ እትሳላት እት ቀበት እሊ ክምኩም ለህለ ድጌ ኢህለ። እንዴ ተዐንቀቀክ እት አካናት ውቁል እንዴ ፈገርኩ፡ ከዋ-ምባይል ተሐዜ ከእግል አቅራቢ ተኣተሰል። በዲር ምን ሐጋት ሕነ ነሐይሰ ዐልነ እት እትሳላት፡ ሐር እሊ ናይ ደዕሮታይ ከዋ ክም ትወተደ፡ ለናይነ በዋራ፡ ወአስክ ከረን ጊሰነ ከትሰአል፡ “እግል ልትገነሕ እልኩም ቱ” ብህላምነ ሰበት ህለው፡ እግል ልትሻፈግ እግልነ እት ሕኩመትነ እንሰኡ።

ሰኣል፡ ከህረበት ብኩም?

በሊሱ፡ ከህረበት ለከዋ ሐሸፌራይ ባጽሕ ቱ። ምን ሐሸፌራይ አስክነ ሐሺሻይ ሐምሰ ኪሎምትር ኢገብእ። ምናተ አስክ እለ ኣቲነ ኢህለ። እሊ ከዋ ከህረበት እግል መብረህት ምን ገብእ ወመሳሌሕ ዓይላት፡ መዳርሰ፡ ዕያደት፡ ማይነ ምን መስለሐትነ ሰበት ቱ፡ እግል ልእቱ እግልነ እንጠልብ።

ሰኣል፡ ቀደም መትከምካም ወሐቀሁ፡ ለመሳሌሕላ ሸዐብ ከአፎ ትቀይሙ?

በሊሱ፡ መትከምካም ለሸዐብ ሰነ

ፍህሙ ወክቡቱ ቱ። ሰበቡ ህይ ሸዐብ ኢትከምከመ ምን ገብእ፡ እግል ልድረሱ ልትዓፌ ወልሕደር ኢቀድር። ማይ ነዲፍ ረከብነ፡ አጀኒትነ ተዐለመ፡ ወክድመት ዓፍየት እግል ሐራሰነ፡ ጅናነ ወርሕነ ረከብነ።

ሰኣል፡ ዕዳገ ምዕል ሰንበት ንኢሽ ብኩም፡ መስለሐተ እግለ ሰካንለ ዳሕየት ከአፎ ትቀይሙ?

በሊሱ፡ ዕዳጋነ አምዕል ሰንበት ንኢሽ ቱ። ምን ለትፈናተ አማክን ከረን፡ ሐጋት፡ ዐደርዴ ውብዕድ ድዋራት ትትወረድ እለ ዕዳጋነ። ለዕዳገ መስለሐተ ሰነ ብዝሕት ቱ። ሳምን ለልአጸነሐክ ወለፍ፡ ለልትበለዕ ወለልትሰቱ፡ ክምስልሁመ ለልትለበስ ኩሉ እብ ረኪስ ምን



እለ ዕዳገ ልትገረህ። ንዋይመ ልትዘቤ ዲቤ።

ሰኣል፡ ምን ክዳማት ለልህይብ መአሰሳት እት ቀበትለ ሱግ ሚ ብኩም?

በሊሱ፡ ለመአሰሳት ሐድ ምንማቱ፡ እግለ ሸዐብ ለልህይብ መንፈዕት ዐባይ ቱ። ደካኪን፡ ጠዋሒን ወመጣዕም ህይ በዜሕ እቱ። እሊ ህይ፡ ለጠዋሒን እግለ አንሰ ምን ድቆ ዕርፍ ቱ፡ ወላመ መአሰሳት ለብዕድ ክዳማት እግለ ሸዐብ ቱ። ሰበት እሊ፡ ምን ሱግ ለልትሐዜ ሓጃት እንሰር ኢነሐግሉ።

ሰኣል፡ እሊ ሱግ እግል ልትጠውር፡ ቲለል ተክጢጡ ሚ መሰል?

በሊሱ፡ እብ አማን፡ ሱግ እግል ልዕቤ ወልትጠውር ወሸክሉ እግል ልሰነ፡ ተክጢጥ ምህም ቱ። እግል ትብኔ ሐቆ ገብአካም፡ ተክጢጥ ምን አለቡ፡ ለብናክ ሳክት ቱ። እሊ ሱግ

ባዋር እቱ ለህላመ አሳሰ ናይለ እት ሰነት 1994 እብ ተክጢጥ ለትህየባ ቱ። ምናተ፡ ሐቆለ ወክድ ለህይ ለኣዳም እት በዜሕ ሰበት ጌሱ፡ ተክጢጥ ሓር ለኣትሐዜነ ሰበት ህለ፡ እግል ሕኩመት ሕቡራም ሕነ ወሰእየት ሃባምና ቶም - ካልእ ዶል እግል ልትከጠ፡ ለአሳሰ ለብነይ እበ ጆሚትረ ለከረዩ እግልነ ብነይ ሰበት ቱ፡ ለተክጢጥ ሓርመ ክም ሰነ እግልነ እኩዳም ህሌ።

ሰኣል፡ መናበረትለ ሸዐብ እት ሚ ተኣተንኩብ?

በሊሱ፡ እሊ ሸዐብ እሊ መብዝሐ - ለ95% እብ ርዕዮ ወሐርስ ቱ ለልትናበር። 5 ምእታይት ቱ ለእብ ተጃረት ልትናበር። ለግረህነ ህይ ማሺሉ፡ ብልቱብ ወሐድ ምኑ ህይ ፋል ልትዘረእ። ምን ንዋይ ህይ፡ ዐጣል፡ አባጌሱ፡ እንሰ ወሐ ልተውብ።

ሰኣል፡ ከዛን እግል ሲቶ ንዋይ ልግበእ ወኣዳም ብኩም?

በሊሱ፡ ምተሐት እሊ ሱግ ሐሺሻይ ኦር ከዛን ብነይ ቱ፡ ላኪን ምን ከረም አስክ ክፍለት ሐጋይ ወክድ ሐድ ቱ ለልአሰቱ። ሰበቡ ህይ ጨበል ሺሸዩ ገብአ። እሊ ከዛን እሊ ህይ፡ ንዋይ ሌጠ ሰቱ ምኑ።

ሰኣል፡ ምን እሊ ከዛን ገሌ ጀራዲን ለጃርቦ ኢህለው?

በሊሱ፡ ጀራዲን እግል ልግበእ

ወቀድረ፡ ላኪን ለጠቢዐትለ ሐርስ ናይለ ኣዳም ትትፈናቱ፡ ጀራዲን ለልአምሮ ወእቱ ለልአስተሰምሮ ሐረሰቶት ሰበት ኢህለው፡ ብዙሕ ልሙድ ኢኮን። ሐንቴለ ከዛን ምድር ርሒብ ህለ፡ ላኪን ኩዳር ለዘርኦ ልገብእ ወዕጪይ ለልአፈሩ አንፋር ኢህለው። እሊ ፈርያት ኩዳር ሰበት ኢትለመደ፡ ለሸዐብ እግል ጽቤሕ እት ሐሊብ ሌጠ ለኣተንኩብ። ገሌ ህይ ኩዳር ምን ብዕድ አሰዋግ እት ለአመጽእ

ጸቤሕ። አምዕለ ዐዳገ ህይ ለልኣትሐዝዮም ኩዳር ለልአገርሆ ህለው።



ሙዲር ዳሕየት ሐሺሻይ መሐመድ መሳ ሓምድ

ሰኣል፡ ለመሕደር ህይ ለሸዐብ ክቡተ ህለ ወለእት ምር ምውስም ሌጠ ሰከን?

በሊሱ፡ ለሸዐብ እግል ልትዐለም ሰበት ለሐዜ ወክዳማት ብዕድ ሰበት ለአቀምት ህለ፡ ለመሕደር ምን ቀልቡ ክቡታቱ። ወእትሊ ሱግ መንዝል ልግበእ ወመአሰሰት እግሉ ቤት ለአለቡ ኢህለ። ዶል ከረም እግል ልሕረሰ ለሰብ አስክለ ምድር ቀሪሙ (ግረሁ) ለብእቱ ኣካናት ገይሱ፡ ወላመ ንዋይ ኪን እት ምድረ ሐርስ ወድዋራቱ ልትረዴ። ለአንሰ ወአጀኒት ላተ ጀላብለ ተዕሊም ወክዳማት ብዕድ እንሰር ሓድር ቱ። እብሊ ቱ ሐሺሻይ ኣዳመ እት በዜሕ ገይሰ ለህለ። ሰበት እሊ፡ ሰካን ሐሺሻይ እብ ክረፍ ሕኩመት እንዴ ኢገብኦ፡ እብ ምራድ ናሶም ቱ እንሰር እትሊ ሓድራም ወእስትቅራም ለህለው።

ሰኣል፡ ዝላም ዮም ዓመት ቅዝር ዐለት፡ ከእሊ ሸዐብ ነግፈ ምን ማሚ?

በሊሱ፡ ዝላም ቅዝር ዐለት ወመደረትመ አጅሬት። 300 ትክል ናይ ሰከን፡ 165 ሽቃቅ፡ ዚንጎ ናይ መካትብ፡ መረበዓት፡ ወክጡጥ ናይ ማይመ እበ ዝላም ትደመረ ምን። እት ንዋይመ ምን ዐጣል 30፡ ምን ሐ 8፡ ምን እንሰ 3 ወምን ኣዱግ 4 ረኣሰ ውሒዝ ነስኦዩ። ዕጪይ ዐባይመ እት ጠረፍ መሓዝ ለዐለ እዴ ጋብኣት እቱ ቱ።

ሰኣል፡ እት ኣክር፡ እግል እሎም ሰካንለ ዳሕየት ለትብለ ፊነ ምን ብኩ?

በሊሱ፡ እሊ ሸዐብ እሊ፡ እት ተዕሊም እግል ልተረድ፡ ንኡሽ፡ ዐቢ፡ አንሰ ወተብዐት እንዴ ኢፈናቱ አስክ ዐግሎ ተዕሊም አጀኒቱ እግል ለኣተንክር እትፋኔ፡ ሰበቡ ህይ ኣደሚ እምበል ተዕሊም ብሂመት ሰበት ቱ፡ ተዕሊም ለትወቀለ ሕሰር እግል ለሆቡ እትፋነዮም።



መቃብለት ርኢስ ኢሰያስ አፍወርቂ . . .

ሰላል= ምን ሓድሮ ተየልል እለን ለቀርባን ግዋሬን ላተን ክል ዱለት እተ ለፈይሐት መንጠቀትን በህለት ዲብ ተየልል ድወል ከሊጅ እግል ንትዐዴ። ሕኩመት ኤረትርየ እበ ለትታለየ ሰያሱት ዕላቀት ካርጅ፤ ምን ድወል አፍሪቀ እንዴ ሐልፈት ምስል ድወል ከሊጅ ዕላቃት መዓወትን ወሽርኩት እንዴ አሰሱት ትከድም ሀሌት። ከሄራር እለ ወራት እለ ከአፎ ሀላ፤

በሊለ= ምን ሰልፋ መንጠቀት እንዴ ኢትጉብእ፤ ግዋሬ በህለት ናይ ቅሩብ አግዋር ሕኩ። እለ ግውርነት እለ ሀይ እብ ከአፎቱ ለእንሽርሐ፤ መንጠቀት ለሐቱ - ምውዳቅ ጸሓይ፤ በህለት ድወል መንጠቀት መዳንን ነሀር ኒል፤ ሶዳን፤ ኢትዮጵያ፤ ግብለት ሶዳን ወምሰር ትከምክም። ለካልኣይት መንጠቀት ግዋሬኑ ቀር-አፍሪቃ ተ። መንጠቀት ቀር አፍሪቀ እግል ተአፍየሐ ወእግል ተአጭብበ ትቀድር ላኪን፤ እግል ኤረትርየ፤ ጅቡቲ፤ ኢትዮጵያ፤ ሶማል ወሶዳን ተሐቅፍ። መንጠቀት ለሳልሰይት፤ መንጠቀት በሐር ቀየሕ ተ። ለምስል በሐር ቀየሕ ለልትሓደደ ዐዶታት ሀይ፤ ኤረትርየ፤ የመን፤ ሰዑድዮ፤ ሶዳን፤ መሰር ወኡርድን ተን። መንጠቀት ለራቤዕ ሀይ ኸሊጅ ተ። እለ አርበዕ ጆግራፍያይ መካሪት ለሕን ጎርነ ወመሳክብነ ለእንብሎቱ።

ዕላቃቱ ወቅርቡ ሀይ እት ሚቱ? እብ ጆግራፍ፤ እቅትሳድ፤ ሰያሱት፤ ስትራቴጂየት፤ መሳልሐ ለትቀራረባቱ። ወእት ሕድ ተእሲር ለወዴቱ። ሕነ ለናይ ወጠንን በራምጅ አውለውየትቱ እግልነ ሰፍ ግረ ለነአጸብጦ እቡ ምስምሰ አለብኝ። እት ሳክበት ሕድ ለተሐሸም ወሕድ ለትሰዴ መንጠቀት ዲበ እግል ንምበርቱ ለትካርጀነ ወለትነፈዐኝ። እለ ሀይ ንሐሬ ወእንከሬ ምኑ ኢኮን ጀብርቱ። ሰበት እለ ዲቡ እግል ንሻርክ ወነአውቄ ለቅድረትን እግል ኒዴ እግል ንቅደር ብኝ። ለመስከለት ተእሲር እንወዴ መይእንወዴ ኢኮን። ተእሲር ናይ ብዕዳም ሰኒ እንመዝኑ። እግል መሰል ተእሲር መሰር፤ መሰር፤ ሱዳን፤ ኢትዮጵያ፤ ሰዑድዮ፤ ናይ ሶማል፤ የመን፤ ውብዕዳት ለትፈናተየ ድወል ከፎቱ? እንቤ ምንጉበእ ክል ሐቱ እበ መቅደረተ ወደቅበ ተእሲረ ብእተ። እት ደንጎበ ላኪን እንዴ ትመቅረሕከ ሕድ እት ትሰዴ እግል ትንበር ቀደርክ ምንጉበእ ሕድ ተአሰ። ሕድ እንዴ አመንክ ለትጉበር እተ መስከብት ከልቅ እኩ። ዐድ-ሕድ ትሰዴ ሰበት ሀሌኩ። ጋር ሰን መንበር ገባይል ወዐቦት እቅትሳድ ሀሌት እከ ምንጉበእ አድሕድ ዶል ትሰዴ ዝያድ ተአወቁ። ክምስልሁመ እግል አምን፤ ድድ ረዐድ፤ ድድ ኢቃኑናይት ተጃረት አሰላሓት፤ ዝቤ(አትሀረቦት) አዳም፤ አግዐዞት ማል ውብዕድ መስከብት

ለትሐምርግ ቀድያት እግል ትክረዕ ሕበር ዶል ትሸቂቱ ለተአደሚዕ። ሰበት እለ ሰልፍ ለመፍሁም ከብቱ እግል ልርኩብ ቡ። ሕዱድ ጆግራፍየት ዲብ አያቱ? ከፎ እግል ልግበእቱ? እለ ለልትክሕድ ኢኮን። ለናይ ደንጎበ ሀይፍ ሕድ እንዴ ሰዴነ ወትመቅረሕነ እግል አግማም ሓር ከፎ አርደት ጣፍሐት እንክልቅ ቱ። እለ ሀይ ሕርያን እንዴ ኢጉብእ ዋጅብቱ። እብለ እግል ንሸቂ ሀይ ለመፍሁምን እግል ነአትመሳንዮ ብኝ። ለተአሸቂነ ሰለል ሀይ ክም ተሀሌ እነ እግል ኒዴ ብኝ። ወእለ ፍጥር ሐዲስ ኢኮን። እግልሚ፤ እት ሐቅ ካቲመ ሐርብ ባርድ እትሊ ደዋሒ መባደረት ቀር አፍሪቀ ትመጽእ ዲብ ሀሌት ዲብለ በዲር ንዝም ለዐለ እንሸቂ ጸንሓም ሕኩ።



ምኑ ዲቡ ኢጋድ ለትበህል መነዘመት ተአሰሰት። ለመክሐደ ላኪን እተ ኢጋድ ለትበህል ሰሚት እንዴ ኢጉብእ እለ መነዘመት አክል አይ መቅሬሕ እለ መንጠቀት ተአሰ። ለዐለ። እግል ጀሐር ወዐማር ለኸሰሰ ተንዝም ክም ተንዝም መቅሬሕ መንጠቀት አፎ ይእንክልቅ ክም ትበህለ ሰኒ ጉብእ ምነ ትብል ፍክረት እተ ዶሉ አንበተ። እት ደንጎበ ላኪን ኢጋድ እግልነ መዝበጠነ ጉብእ። ኢጋድ እት አክል ናይ መቅሬሕ ሰኒ፤ ሕሸሞት ሕድ፤ ወአርድየት ዐማር እለ መንጠቀት ጉብእ፤ ዔማት ፍተን፤ መምሬሕ አጃንደት ማፍየ ወመናጌእ መትኦታይ አጃንዳት ካርጅ ጉብእ።

እት 2006 ሀይ እብ ገበይ ወያኔ ወገማት አሚሪክ ውብዕዳት ወራር ሶማል መጽኦ። ለልትሐዜ ዐለ አግቡይ መቅሬሕ/ውሕደት እለ መንጠቀት ኢሸቀ። ሕነ ሀይ ዕዳውየትን ጀመድናሁ፤ ኢሀሌነ ዲቡ ወእግል ነሀሌመ ኢኮን። ከእለ ንትሃጌ ዲቡ ለሀሌነ አርእሰ መሕደር መንጠቀት ምነ በዲር ጸንሐ አፍካር ለልትፈንቴ ኢኮን። ሐት-ሐቱ ዶል ለትራዘቀ መሰል ጉብእ ሕነ ላኪን ገበይ ረያም ጋሳም እቱ ሰበት ሀሌኩ የም አለቡ ተሐድያት አንዴ ባተክነ ሰበት መጽኦኩ። ጠዕም መቅሬሕ መንጠቀት ዝያድ ብዕዳም እንፍህመ። ለቀድየት ናይ ግዝፍ ጆግራፍየት፤ ብዝሐ ሽዑብ

ወደቅብ ኢኮን እቅትሳድ ኢኮን። ቀድየት ሕዚ ሰላም ወመስከብትተ። ሰላም ወመስከብት ምን ለሐዝዩ ወሰኒ ሸቂ እለ ምን ልትበህል እግልነ በድረነ ዲበ አለቡ። ሓይላም ብዕዳም ሕናመ ምን ይእንብል፤ እግልነ ላኪን ዝያድ ብዕዳም ለሀመን። ናይ ፈጅር ወሐቀ ፈጅር አጃንደትን ሀይ ኢኮን። ከፎ ትሸቂ እቱ ላኪን ሐቅ ክሉ እለ ክእሉል ተጃርብኝ እለ አዜ አርበዕ መንጠቀት ለቡ መሳክብነ እንብሎ ለሀሌነ ዲቡ ለለአመጽኦነ አሳሰ ብኝ(building blocks) ሚቱ። ሚ ምስዳራት እግል ንንሰእ ብኝ። እብ ንዩት ሰኔት ሌጠ ለትሸፍግ እቱቱ? ሓድረት ሓሰት እንዴ ኢትጠፊሕ፤ እብ ሰምዲታት ኖሰክ እግል ተአምጽኦ ትቀድር? እለ መሰል ንቃዋ እግል ልትወደሕ ወልሰፊ ሀሌት እለ።

ልባሌሐቱ ምን ልብሉኒ ኣነ አብደዮት ወቅትቱ ለእብሉ።

ዲብ በሐር ቀየሕ ለሀለየ ድወል ክለን፤ ቀደም ክሉ ሰላም ወመስከብት እግል ለአክደ ሀሌት እለን። ለኢለትሐዝዩን ተጠውራት ዶል ልትሻብብ ለእበ ከረዓሁ መቅደረት እግል ልምለኩ ክል ደውለት ናይ ኖሰ በቃዐት መዳፈዐት ወአክዶት አምን እግል ተአደቅብ ሀሌት እለ። ምር እት አካን ምር እግል ልሕለፍ ኢቀድር። ክል ምንን አሰክ ልትቀደረ በቃዐት በጽሐት ምንጉበእ ናይ ክለን እት ሕድ ክም ትጀመሪ ዝያድ ደቅብቱ ለሀህይብ። ክምለ እብ በንበይንክ ለትርእዩ ኢኮን። አህዳፍነ እንዴ አትመሳን፤ መቅደረትን አዳበርነ ምንጉበእ ምስል ዶል እንሸቂ ተእሲርነ ለትደቀበ ጉብእ። ወሀደፍነ እንበዴሕ። ምኑመ ወኪን ሕየል ካርጅ



እግል ንዕዘም እቱ ለብነ ቴለል ለሀሌ። ለመስከለት ናይ እቢ ወፍቲ ኢኮን። መቅደረትን ሐቅ ትወቀለት ሰዳየት ብዕዳም እግል ተአድሕነናቱ ኢኮን። ሕነ መቅደረትን ሐቅ የአትመሳኒን ብዕዳት ቅዋት እት አካንን እንዴ ሐልፈየ በሐር ቀየሕ መስከብት ለሀህይሁ በህለት ኢኮን። ደለ ጉብእ መንበራጥዓይ እግሉ ምድርን እግል ነአዝቤ ወገበይ እግል ንፍተሕ ኢኮን። ሰበት እለ ለካልእ መትሰዳዳይ ናይ ክልናቱ። ዲሹ አምን ወቅዋት በሐር ምስል ተዓወነው ምንጉበእ ዝያድ እግል ለአድሚዕቱ። ሐቅህ መትኦታይ ካርጅ ወሕየል እዲነ አትሐዘ ምንጉበእ ሕድ እንዴ ገሚነ እግል ኒደዩ እንቀድር። ምርክ እበ ትመሰሎ እግል ልሸቂ ኢቀድር።

አዜ እት በሐር ቀየሕ ነሀድግ ሀሌነ ድኢኮን ምኑ ወኪን እት ቀር አፍሪቀ፤ መጀራብብ ኒል፤ ውብዕድ እቡ ዶል ነሀድግ ለመባድእ ህቲቱ ኢልትቀየርኒ። እግሉ ለኸሰሰ ስትራቴጂ እንዴ ፈግረ፤ ተፋሲል አህዳፍ እንዴ ትረተበ ሐቅሁ ገበይ(ኣልየ) ፈግር እለ። ወእለ እብ ሱብ ምህነት እግል ልደረሰ ሀሌት እለ።

ክለን ለዲቡ ሻርክ ድወል ዲብ ሐቱ ጀላብ እግል ልምጸኦ ክል አርእሰ እግል ልሀደገ ዲቡ ለትሐዜ። ለመንጠቀት ወለዲብ ቀብተ ሀለ ሀይኦት

ገበይ ሸቅሉ ባይን(ትራንስፓርንት) እንዴ ጉብእ እግል ልትዳሌ ቡ። እለ አብ ሐቂቀት እግል ንሸቂ እቡ ሀይ ምን ሰምዲት ወመካይድ ግውትይ እግል ኒሪም ብኝ። ንዩትከ ወሀደፍክ አብርሆት ሌጠ እንዴ ኢጉብእ ለዲቡ ለአበዴሕ ተፋሲልመ እግል ተአጥፊሕ ለትሐዜ። በሐር ቀየሕ ክም ትበህለት እትለ ኢለትሐዜነ መክሐደ ለለሀርሰ ወእት ሕድ ለኢበይእ ጋራት ዲቡ ለተኦቱ አለብኝ። ለለአትሃጌነ ንቃዋ ሐቱ አብ ሐቱ እንዴ ረተብናሁ ገበዩ እግል ኒዴ እለ ገኣነ ምንጉበእ ሐቲክ እብ መርሐለተ ሰፍ እግል ነአጽብጠ ምኩ። እለ ሀይ ዓም መምሬሕ ገበይ(ርድ ማፕ) ቱ እግል ኒበል እንቀድር። ምናተ ክሉ ሸይ አሰፊነ ይእንብል። እት ሀድግ ትሉሉይ ሀሌነ። እለ እግልነ ፍክር ሐዲሰ ኢኮን። በራምጅን ለዐለሚናቱ ወግረ እለ እተ ሀለ እነ በራምጅ እት ነአጽር ለነአመጽኦቱ። ምነ ፍክርነ ለሐሰ ብዩ ለልብል ልብነ ወዕንነ እንዴ ከፈትነ እግል ንስመዕ ምኑ ዱሉያም ሕኩ። ሰበት እለ ፍክረት ሕድ እነሰእ ከእት ደንጎበ ዲብ ምር ፈሀም ሕበር እንበዴሕ ከምኑ እት ፈዓልየት ንትዐዴ። እለ ዶልክ እንወድዩ ለሀሌነ ዲፕሎማሲያይ፤ ሰያሱይ ውብዕድ ልጃኦትመ ምን እለ ሰርዐት እለ ለፈግር ኢኮን። ምስል ሱብ ሸርከትን ሀይ እት ፈሀም ሕበር እግል ንብጸሕ ለልትቀደርቱ። ኣነ ለቴለል አሰከቱ እብል። እግልሚ እለ መንጠቀት በነ ኢኮን እንርእየ ለሀሌነ። ዲብ ዐለም ሚ ተቐዩር ወመካይድ ሐዲሰ መጽእ ሀሌ፤ እግል እለ መንጠቀት ሀይ እብ ከፎ ለአሰር እተ። እት አሚሪካታት፤ አርቡ አሰየ ለመጽእ ተቐዩር ከአፎ ለአሰር እተ ፍሂም ለአትሐዜ። የም ዐለም እት ሕድ ትትቀራረብ ዲብለ ሀሌት ዲቡ ዘበን እግል ናይ ደዋሒን ወመንጠቀት ምን እለ መካይድ ዐለም እንዴ አፍገርነ እግል ንርእዩ ይእንቀድር። ምስለ ሀለ ተየልል እግል ኒጊሰ ብኝ። ክል ሐቲክ እበ ወጀህ እት እንርእየ ለገበይ ጸብጣመ ሰበት ሀሌነ ምስል ወቅት እት እንጠውሩ ወነአበሸሉ እግል ኒጊሰ እግል ንቅደርቱ በሃላይ ኣነ። ለሐሰ ፍክር ሀለ ምንጉበእ ሀይ እግል ንርኤ ወንሰመዕ ዱሉያም እግል ንግበእ ሰበት ብናቱ ትሉሉይ ለሀድግ እንወድዩ ለሀሌነ። እግል መሰል እት መራቀብት ኣርሃብ። ከፎ እት ናይ ሕበር ፈሀም እንበዴሕ። መቅደረትን ወአርዝቅነ እንዴ አትመሳኒን ነአደሚዕ እግል ልትወደሕ ሀሌት እለ። ለናይ ደንጎበ ሀይፍ ላኪን መስከብት ተ። ረዐድ፤ ዘማቱ፤ ገዲብ፤ ወራር፤ ከይናት ወዝልም ኢነሐዜ እንዴ እንቤ ክልነ አተፈቅነ ምንጉበእ። ዲቡ ለለበዴሕ አግቡይ እግል ንቅፈር ቅድረት ሀሌት። እቅትሳድ ውብዕድ አርእመ አሰኩ ለዋሌ ቱ እግል ልትበህል ቀድር። እግልሚ እት 21ይ ክፈል ዘበን ሀሌነ ሐር እግል ነአቅብል አለብኝ። እለ ዋጅብቱ ድኢኮን ሕርያንመ ኢኮን። እብ ፍንቱይ ሕኩ ለአምጸኦት ሓለት ተአምጸኦነ። ደርሰ ካሬ ራክባም ሀሌነ። ቀድየትን ናይ ቤትን ኖሰነ ለነአጸኦሕ አው ለነዐዴ እበ ምስምሰ አለቡ። እትለ ፊይሐ ደዋሒ እግል ንምበር ላዝም ሰበት ገኦ ሀይ እንሸቂ እለ ሀሌነ።

“በሕ ከህላት እግል ክሸቦ አንሳይት” ትብል ሀሌት ሰሰ ፌብሩወሪ

ናይ ዮም ዓመት ሰሰ ፌብሩወሪ ሸባብ ግዴታም እግል ልውደው ክም ቀድሮ ንትጸገም ለትብል ልእከት እበ ትዘከረት። ለፈጅር ሰብ ማል ወዕያል ለጉብኡ ሸበንክሊታት ዮም፡ መደረት ክሸቦ አንሳይት እብ ዋዴሕ እግል ለአሙረ እግል ልትዐለሞ ሀሌት እሎም። ተቐዩር እቦምቱ ለመጽእ። ዐለም እለን ተልየ 10 ሰነት ዕቁድ(decade) ሰላመት አዋልድ እግል ቲደዩ ናውየት ሀሌት። አሰክ ሰነት 2030 ክለን አንሳት እት ክለ እዲነ መላጽዮታት ወሐዳይን እንዴ ኢልትከሬ እትን እግል ልዕቦዩ፡ ምን ክሸቦ ወህድጉ እግል ለአባርዮ፡ ክል ደውለት እበ ቅድረተ እግል ትጸገም ገለድ አትየት ሀሌት። ለገለድ አማኑ እግል ትትመርዴ ሀዩ፡ ዲብለ ምን 20 ሰነት ወተሐት ለዓማርም ሸባብ እስትሰማር እግል ልግበእ ወጅብ። እስትሰማር እት ተዕሊም፡ አፍዝዖት ወአሰበቀት አፍካር ሰሊም።

አሰክ 2030 ክሸቦ ህድጉ እግል ልትከሬ

ክሸቦ አንሳይት ለልትበህል፡ እት ዐውረት አንሳይት(ቅን ወባካቱ) ለጉብእ ጅረሕ፡ አው ሸክል ለትበድል እግል ቀረድ ሸፈ እብ ሐኪም ለኢትፈረደት፡ እብ እድንዩ አጅሐፎት እት ሐቀ፡ ዓፍየተ፡ አግመሞተ ለከምክም ዐመልየት ።

ወለት ዶል ትከሸብ እተ ዶለ ለትመጸአ መደረት አሰክ እት ቅያብ ተአቴ ለትወድየ መጸጸት ድቅብት ሀሌት። ደም ብዙሕ ልትከዔ ምኑ፡ አረር ወመትሰንዳር ሰብብ ዲቤ ሸን ግያሰ ተአቤ እለ ሸን እግል ትክረዕ ትቀድር። እለ እንዴ ሐልፈተ ሰነት አዳም ክም በጽሐት ሀዩ እት ውላድ ወፍሬ፡ እት ጅመዕ ለተሀሌ ዐዛብ ወእት ዓፍየት ዐቅለ ለተሀሌ ሸንርብ ምስለ ለትነብር ወሰራይ ቀሊል ለኢልትረከብ እላተ።

ክሸቦ አንሳይት እት አፍሪቀ ዝያድ ሰር ምነ ድወል ወድያሁ ምንመ ሀለየ እት አፍሪቀ ሌጠ ክሩዕ ኢኮን፡ እት አሰየ ወላቴን አሜሪካመ ጉብእ ሀለ። ዲብላመ ተርከያሁ ለልትበህለ ድወል ምውዳቅ፡ ምን እሊ አምዳር እሊ እንዴ ለጅአው ሳክናመን ለሀለው ገባይል ወድዉ ሰበት ሀለው ለመሰአለት መሰአለት ክለ እዲነ እግል ትግበእ ቃድረት ሀሌት።


እግል ልሰረት ገአ ምንጉብእ ሀዩ ክል ደውለት እት ቀበተ ወክለ እዲነ ፍንጌ ኖሰኖሰ

ክሸቦ

ለትመቅረሐ ወለኢለትካርም ንዛሙ ለጸብጠ ሸቅል አትፋዘዕ፡ ዐለሞት ወአተግባር ቀዋኒን ለአትሐዜ። ክሉ ሙጅተመዕ ሀዩ እግል ልሻርክ ለቀድር እቡ ኤታን እግል ልትረሰም ሀለ እሉ። ክል አደሚ ገርቡ ታምም እት እንቱ እግል ልንበር ሐቅ ምን ሕቁቁ ክምቱ፡ ክሉ አደሚ አንሱ ወተብዐቱ ሰወ ክምቱ ድወል ገባይለን እግል ለዐልመ ሀሌት እለን። ተዕሊም ገርብ ፍሬ ወዓፍየቱ ክሉ ክም ለአምሮ እግል ሊደዩ፡ ክምሰልሁመ ለአረይ ክሸቦ ጉብኣየ አንሳት ሚ ጅርበት እበ ለሐልፈ ሀለየ እንዴ ተአመረ፡ መሻክል ዓፍየት ገርብ ልግበእ ወዐቅል ለትባሌሕ ምንን ሰዳይት እግል ልርከቤ ምን ሙጅተመዕ ወለኸሰሰን ጀሃት ለለሰትሀለን እህትማም እግል ልትሀየበ ወጅብ።

ሐር ምን ክሸቦ ለዐልነ ለሀለየ ቀርያት ኤረትርየ እት በዘሐ መጸአ ሀለዩ፡ ምነ 2,640 ዐዶታት ኤረትርየ

ምን 2017-2030 ኤረትርየ ሐር እግል ትግበእ ደማን ለለህይበ ሄራር ንርኤ



ደቅብ ሸባብ ልትበርበር ወለአውቁ! ቴመ እድንያይት ምዕል በሕ ከህላት እግል ክሸቦ 2020

እት 2012 መጅልሰ ዓም ናይ መዝመት መጅልሰ ቅራን ሰሰ ፌብሩወሪ እድንያይት ምዕል በሕ ከህላት እግል ክሸቦ አንሳይት ትግበእ ልብል እት ሀለ፡ ለእቡ ትጀሬ ሀሌት ምንለዐል ለኢትረኤ ምስክነ ሸባብ ዐለም ሰኒ እግል ለአምረ ከበሰር አብደዮተ ደቅብ እግል ልርከብ ምን ሐዛቱ።


ክሸቦ አንሳይት እግል ልሰረት ገአ ምንጉብእ እት ክል ሕተት እለ እዲነ ለሀለ አደሚ እበ ቅድረቱ ናዩተ እግል ሊዴ ሀሌት እሉ። ዕልብ አዳም እት ዘይድ ገይሰ ሀለ ምስሉመ ሸባብ እት ትበዜሕ ትገይሰ ሀሌት፡ እለ ሸባብ እለ ዋጅብ እስትሰማር እንዴ ገአ እተ ቀራር ራቴዕ እግል ትንሰእ ሰድየተ ሀዩ ምሮ ወአግደ ምነ እተ ጋሪት

ኦንጉሊያቱ

ለልዐውት ጸገምቱ። ክሸቦ ሌጠ እንዴ ኢጉብእ ክሉ እምበል መደረት መንፈዐት ለአለቡ ዓዳት ዴራይ እግል ልትረፍ ለቀድር ሸባብ እብ ፈዛዐት ዶል ትትዐንደቅ እቱ ቱ። እትሊ ታርፍ ለሀለ ምሮ ዐቅድ(10 ሰነት) ሸባብነ አምር እንዴ ዐንደቅነ አሸቁናህ ምንጉብእ ክሸቦ አንሳይት ውብዕድ ዓዳት ሙእዚ እግል ልተረክ ክም ቀድር ሰእየት ዐባይ ጋብኣት ሀሌት።

አማንተ እሊ ለመድ እሊ ዲብ ሙጅተማዓትነ እንዴ አመሰረጠ አላፍ ሰኒን ጸኔሕቱ። ሰኒ ዴራይ ምን ጉብኣ ላኪን ክሉ ለእግል አተላላዩ ሕጌ ጋብእ ለዐለ ፈሀም ካጢ ክም ትሰየሐ፡ መደረቱ እብ እሰባት ወድራሳት ክም ትበየነት ወትቀለዐት ሸባብ ኖሱ ነክረዩ። ክል ሸኪክ እብ ኖሱ ቀዋኒን እንዴ አፍገረ እግል ልምንዖ ዶል አንበተ ሀዩ፡ እግል ክለ ወጠን ለልሐቅፍ ቃትን መኔዕ ክሸቦ ፈግረ። ምነ ቃትን ፈግረየ እት ቀበት 13 ሰነት ልትሐሰብ ለኢነብረ ተቐዩር ዐቢ መጸአ። በደ ወክም የዐለ ጉብኣ ለእንብል

መቅጠኑ ኦለብን



እዳራት ደዋሒ ልትከሬ። እለ ለጅነት እለ በራምጅ ምህሮ ወአትፋዝዖት ትነዝም፡ ሚ ጉብእ ሀለ እንዴ ታበዐት ምን ገበይ ለፈግረ እት ቃትን ተአቀርብ፡ ሰዳየት ለልሐዝዩ ክም ልትሰደየ ትወዴ፡ ድራሳት ወጌማም ትወዴ። ፈድል እሊ ዶልከ እት ልሰፊ መጽእ ለሀለ ግዛም አፍዝዖት ወራቀቦት ዲብ አቅሊም ዐንሰበ ሌጠ ረኢነ ምንጉብእ ምዴርያት አሰማሞ ወሀበሮ ሐር ምን ክሸቦ ክም ጉብኣየ አወጀዩ፡ አሰክ እለ ሀዩ እትለ ዐውቴህን ሕፋዛት ሀለዩ። ምዴርየት ሐልሐል ወዐድተክሌዛንመ ረያም እትለ ኢኮን ውቀት ክም ለዐርየ ነርሰ መንሱር አቡበከር ምን ሐጋት ምስል በርናመጅ ገለብ ደሐን ክርን ገቢል እተ ወደየ መቃበለት አከደ። እብ ደረጀት ወጠንመ ምን ተሐት ሐምሰ ለዕምረን ለትከሸቦዩ አዋልድ እት 1% ክሩያት ክም ሀለየ ምን ውዛረት ዓፍየት ለትረከበት ሐብሬ ተአክድ።

መትመዳድ ክሸቦ እብ ደረጀት ወጠን

ለሸባብ እትሊ ሰርገል እግል ልብጸሕ ለቀድረ እኪት እብ ዕንቱ ልርእየ ምን ሀላቱ። ነርሰ መንሱር

እት ሸሬሕ፡ “እብ ሰብብ ክሸቦ ብዙሕ ለተምነዎ ጅነ ታምም ዶል ውልደት ዲብ መይት ምኖም፡ ዘንብ ለአለበ ወለቶም እት ለሐግሎ፡ ገበይ ለእበ ልትጃምዑ ምን ኢረክበው እት ሕድጎ ለበጽሐው ልርኤ ለሀለ ሸዑብ፡ እብላሁ እግል ልንበር ኢሊሐዜኒ። ምስለ ለጅነት መራቀብት ምን ቅሩብ ልትዓወን ወሐብሬ ለሀይብ ሀለ” ልብል። ፈድል መዓወነት እሊ ሸዑብ እት ቃትን ለቀርበዩ ዓይላት ሀለዩ። ለአክሸቦዩ፡ እት ልርእየ ለአዝመዩ፡ እት አክሸቦት ለተዓወነዩ ክለን ምን ጀሪመት ሐር ሰበት ኢጉብኣየ እብሊ መሰል ፍዕል ሸክ ለትቀደመት እተን 226 ገበኣ እት ሀለየ ምን እለን 148 ለትፈናተ ቀራማት ተሐከመ እቶም። ለለመድ አሰክ እለ ምን ክለ ኤረትርየ ምሐይ ሰበት ኢሀለ ካቴማሁ እግል ንርኤ ኣዜመ ተረት ሸባብ ልትዓደለ አለበ። ውዛረት ዓፍየት 2030 እንዴ ኢተምም ኤረትርየ ምን ክሸቦ ሐር ክምተ እግል ተዐልን ክምቱ እብ ደነት ትሸሬሕ እት ሀሌት እት ፈዛዐት ሸዐበ እንዴ አምነትቱ።

ዕምር	ድራሰት 2010	ድራሰት ክሸቦ 2014	ድ/ክሸቦ 2017	ድ/ክሸቦ 2018
ተሐት 15	33.2%	18.0%	5.8%	3.8%
ተሐት 5	11.5%	6.9%	3.3%	1.0%

ገሌ ከበር ሚ ብኩም?

እት 2020 ሌጠ እት ክለ ዐለም 4.1 ሚልዮን አዋልድ መላጺ ክሸቦ እት ረኣሰን ተአንጦሞል ሀሌት።

እብ አሳሰ ተቐዩም ሙዝመት ሸዑብ መጅልሰ ቅራን(UNFPA) ክል ወለት ምን ክሸቦ እግል ተአንጄ ለትጠልበ ሚዛዝየት 95 ዶላር አሜሪካ ሌጣተ።

እት 30 ክሸቦ አንሳይት ልሙድ ለገአ እተን ድወል ዐለም ዕልብ ሸዐበን እት ወሰክ ገይሰ ሀለ፡ ዕልብ ለልትከሸባመ መሞ-መጦሩ ወሰክ ሀለ።

ለሰእየት ተሀይብ እት ክሸቦ አንሳት ልሙድ ለገአ እተን ድወል ለነብሮ እት ዕምር 15 – 19 ለሀለው ሸባብ እግል ክሸቦ አንሳይት ለሐደ ተእዩድ ምነ እት ዕምር 45- 49 ለሀለው።

እት ብዝሓት ክሸቦ አንሳይት ለኢሐድገው ሙጅተመዓት፡ ምነ መላጽዮታት እንዴ ሰልመየ ታማት እት እንተን ለዐብዩ ለሀለዩ፡ ምስል እማተን ወአቦታተን ዶል ልትቃረን እብ ዕጹፋት እት በዘሐ መጸአ ሀለዩ።


ምስል ሰን አንሳት ዕላቃት ለቡ ዕሎታት እድንያይ ሰማን ማርሰ እድንያይት ምዕል አዋልድ አንሳት

19 ጁን እድንያይት ምዕል አሰረቶት ዕምጽ/ቀጭፍ እት መደት ነበር


11 አክቶበር እድንያይት ምዕል አዋልድ

25 ኖቨምበር እድንያይት ምዕል አሰረቶት ዝልም ወዕንፍ ድድ አንሳት

10 ዲሰምበር እድንያይት ምዕል ሕቁቅ አደሚ



አቅሊም ግብአት በሐር ቀያሕ ወመካሪቱ



1^ይ ክፍል

አቅሊም ግብአት በሐር ቀያሕ እብ እንክር ምውዳቅ ጸሓይ ምስል አቶብዩ፡ እብ ምፍጋር ጸሓይ ወቅብለት ምስል በሐር ቀያሕ፡ እብ ቅብለት ምፍጋር ጸሓይ ህዩ ምስል አቅሊም ቅብለት በሐር ቀያሕ፡ እብ ግብአት ምፍጋር ጸሓይ ምስል ጅቡቲ ለልትሓደድ ምን አቃሊም ኤረትርያቱ። እሊ አቅሊም እሊ ምን ተርፋ አቃሊም ዐድነ ለፈንትዩ ህለ ምንገብእ እብ ተማሙ ዲብ ቀበትለ እግል ምፍጋር ጸሓይ አፍሪቅያ እንዴ ሸገ ለለሐልፍ ምዕቃቅ አው ሪፍት ሻለ ምዱድ ሰበት ልትረከቡቱ። ፍይሔ አቅሊም ግብአት በሐር ቀያሕ 23,384 ኪሎሜትር መረበዕ ገብእ።

መካሪት ምድር አቅሊም ግብአት በሐር ቀያሕ

ናይ ዕሉም ምድር ብሐሰ ወድራሳት ክምሰሉ ለሐብር። ለናይ ደንጎበ መባትክ ምድር ናይ እሊ አቅሊም እሊ ለትክውን ዲበ ሐልፈ 3ሚልዮን ሰነት ምንማቱ። እሊ ህዩ ሸክል አው መባትክ እሊ ህዩ ክምሰል ፍግሪት ናይለ እት ገጽ ምድር ገብእ ለዐለ ዐመልያት ጠቢዐት በህለት ናይ ትሉሉይ አንቀጥቀጢን፡ መትሳጣር፡ ብርካን፡ ውበዕድ አሰባብ ጠቢዐት ክምሰልቱ ዑለመእ ዕሉም ምድር ለአክዶ።

አቅሊም ግብአት በሐር ቀያሕ፡ እብ መካሪቱ ልትረኡ እት ህለ፡

49% ጋድሞታት፡ 44% አድብር ወዐክል፡ 7% እብ ብርካን ለነደ ምድር ሸምል። ለእብ እንክር ምውዳቅ ጸሓይ ለህለ ወቁል አድብር፡ ምን 500 አሰክ 2000 ምትር ምለዐል ጠፋሐት በሐር ለህለ እትገብእ፡ እሊ ድዋራት እሊ ብሩድ ወጥሉል ሓለት ሀዋእ ብዲቡ። ለእብ እንክር ምፍጋር ጸሓይ ለህለ ጋድሞታት ህዩ ምስል በሐር ለልትጋድ ምን 0 አሰክ 500 ምትር መትወቃል ለቡ ይቡስ አው ሰባት አው ሕፋን ሓለት ሀዋእ ብዲቡ።

እሊ አቅሊም እሊ ብዙሕ ርዝቅ ምድር ወማይ ለብዲቡ ሌጠ እንዴ ኢገብእ፡ ተእሲስ ወድ ሚን አድም ወአግቡይ ተጠውር ለለአክድ እሰባት ዲብ ከርሱ ክዙን ክምሰልሁም ዲብ እሊ ለሐልፋ ሐጨር አውካድ እበ ገብእ ብሐሰ ዕሉም ምድር እግል ልትአክድ ቀደረ።

ምን ርዝቅ መዓድንማ እሊ አቅሊም እሊ ርዙቅ ቅሊምቱ። መሰለን ፖታሰዩም፡ ሶድዮም፡ ስምንት ወእግል ኖረት ለገብእ መዓድን ክምሰልሁም እግል ቅርር ለነፌዕ ሳንድ ሰቶን፡ እግል ብነእ ለገብእ ሕጽሕጽ፡ ፑሚስ፡ ጨውት ወለምሰሉ ክምሰል ህለ ልትሸረሕ።

300 ኪሎሜትር ለሪሙ ግንራራብ በሐር ለመልክ፡ እግል ቤጽሐት ለልሰሕብ ወዕንታት ለሳሬ ጋድሞታት ወበሐሩ፡ ምስለ ዲብ

ክል አካን ለልትረኡ ለትፈናተ ጅንሰ ሔዋናት ክምሰልሁም ብዙሕ አጅናሰ ዕንቦባታት በሐር ክምሰል ብዲቡ አምበል እሊማ ሐድ 30 ለገብእ ጀዛይር ዲብ እሊ አቅሊም እሊ ክምሰል ህለ ልትአመር።

አድብር

ቀደም እሊ ክምሰሉ ተሐበረ፡ እንክር ምውዳቅ ጸሓይ ናይ እሊ አቅሊም ወቁል አድብር ወዐክል ክምሰልሁም አወድግ ለበዝሐ ዲቡ ምድርቱ። ገሌ ምኑ ብዙሕ እግል ልትሸረሕ ለቀድር። ለሬመ ደብር ዲብ ምዴርየት ደንካልያ ለህለ ደብር ራምሎ መትወቃሉ 2248 ምትር መለዐል ጠፋሐት በሐር ገብእ እት ህለ፡ ዲብ ምዴርየት አራዕታመ ደብር የላዒ መትወቃሉ 2000 ምትር ወዲብ ግብአት ደንካልያ ህዩ ደብር ሙሳ ዐሊ መትወቃሉ 2021 ምትር፡ ወደብር ሳርካዕሊ 1575 ምትር ምለዐል ጠፋሐት በሐር ለህለው ገሌ ምን አድብር አቅሊም ግብአት በሐር ቀያሕ ክምሰልቱ ልትሀደግ።

መሓዛት

ለበዝሐ መሓዛት አው ሐላይል አቅሊም ግብአት በሐር ቀያሕ፡ ምን ወቁል አድብር ለልትበገስ እት ገብእ፡ ሐሳም ህዩ ምን ግዋሬ ድወል ለልትበገሶቶም። ለዐባዩ ሐላይል እብ ሸክል ሰብረት ዱሉልያም ህለው። ምን ብዝሓም ነኣይሸ ወዐባዩ መሓዛትለ አቅሊም፡ ሐድ 30 መሓዛት ለትፈናተ ቅያሰ ለቦም እትገኡ፡ ዲማ ማዮም ለዛሬ መሓዛትቶም። እሉም ዓዳይሉ፡ አጊዶሊ፡ ደረብ፡ ጋሓራ፡ ዶብዓ፡ ኣሎ ወሐርሲለ እግል ልትሀደግ ቀድር።

እብ ተውሳክ መሓዛት እንኪዳሉ፡ አሌሌ በይሉል፡ ጋሓሬ ሳርይታ እት ምስተቅበል እት መናፈዕ

ምን ሔልየት ሐባብ ዐድ ህብቱስ ላቱ መሐመድ ወድ መዲን እግል አፍ ሓሬን ለሐለየ ሕላየት ክእነ ትብል፡

ዮም ለደብክ አትሃደደት ኢትዘራኬት እብ ሐሳይ ሮረ ረኣሱ አብረደ ምን ተሐት ምዮ ወሕዳይ ወለምዕርብ አብረደ ምን እት እብን እት መርኣይ ገብገብመ አብረደ ትካረው ክልኦት ለግራይ ደውደው ሐማል ደነዩ ሸምን ሰዋረ እት ሰላይ እም ዕትሮመ አብረደት ክልኦት ዛዘ ወሄክላይ ነቅፈ አብረደት ተበን መልኦ ወጨብላይ መስከብ ሕሙይ ተ ወሓሚ መስከብ አባይ ተ ወፈታይ እንዶ ዐለት ተትህዴ አግረዕ ተአውድ መትከራይ ምንዲ ትድህር እብ ሳይራት ወምንዲ ትወቅል እብ ምትዋይ። ለእለ ተኣቱ ኢነአምር ሳርደት ዐለት እብ ምስማይ አፍላግ ጸቢብ አብረደ ክልኡ ድልዮ ወበልዳይ ወአፍላግ ርሒብ አብረደ አድ ወድ ገለብ ወፍዳይ ለሕጻጽ አብረደት ጎ ለዛውየት ወድ ሸግራይ

ሐርስ እግል ልውዐሎ ለቀድሮ መሓዛት አቅሊም ግብአት በሐር ቀያሕ ቶም። መስለን እሉም እንዴ ተለው ለልሰመው 8 መሓዛት ምን ኣዶ ወአሰክ ኣዶ ገይሶ እብ ሐት ሐቱ እግል ንርኣዮም ቱ፡

1. መሓዝ ዓሰቦል ምን ደብር ሙሳ ዓሊ ለልትበገስ እት ገብእ እት በሐር ቀያሕ ለዐይር። ሪሙ 90 ኪሎሜትር ህዩ ልሄርር።

2. መሓዝ ጊብዶ እሊ መሓዝ ምን ደንክል ለልትበገስ ወእግል ጅብዶ ለልትበህል ቤጭ ጫጮት ለልትመወን ዓሳታት ለልትፋሬ ዲቡ እት ገብእ እሊማ ዲብ በሐር ቀያሕ ለዐይር ወሪሙ 85 ኪሎሜትር ገብእ።

3. መሓዝ ራንዳሌ ምን አቶብዩ ለልትበገስ እብ ሕዱድ ኤረትርየ ወጀቡቲ እንዴ ሐልፈ ዲብ በሐር ቀያሕ ለኣቱ። እሊ ሕሊል እሊማ ሪሙ 85 ኪሎሜትር በዴሕ።

4. ሕሊል ሐርሲሌ ምን ደባይሲማ፡ ማንዳ ወስቡክ ዲብ ልትወለድ ጊብዶ ወሐርሲለ እንዴ አሰተ ዲብ በሐር ቀያሕ ለሐልፍ። ሪሙ 85 ኪሎሜትር ገብእ።


5. መሓዝ ሱብክለ አው ገሊማ ምን ሰቡክለ ወደንጉዲ ልትበገስ እብ ጢዶ እንዴ አበለ ዲብ በሐር ለኣቱ ሪሙ 80 ኪሎሜትር ገብእ።

6. መሓዝ ኢንካዕሌ ምን ጅቡቲ ልትበገስ ወእብ ፍንጌ ክሎማንዕይሉ እንዴ ወደ ዲብ በሐር ለኣቱ ሪሙ 80 ኪሎ ሜትር ቱ።

7. መሓዝ መንገላል ምን ገዓር ለልትበህል ምድር ልትበገስ ወዲብ በሐር ለኣቱ ሪሙ 65 ኪሎሜትር ገብእ።

8. መሓዝ ዊኦኣማ ምን ታጁራ ጅቡቲ ልትበገስ ጋድሞታት ጋሕር እንዴ አሰተ ህዩ በሐር ቀያሕ ለኣቱ። ሪሙ 64 ኪሎሜትር ቱ።

ልተላሌ.....



ሸባብ



ሕዱግ ሰሌማን

ሓይሳም ወሓይሳት ቁርኣት ሰፍሐት ሸባብ፡ እትለ ናይ ዮም ሰፍሐትነ፡ ጋሽይ ሸባብ እግል ለሀሌ እግልናቱ። ከናይ ዮም ገሻይነ መሰኡል መሕበር ወጠን ሸባባት ወደረሰ ኤርትራየ፡ አቅሊም ግብለት ቢሐር ቀየሕ፡ ሻብ፡ ዕሰማን ዑብደልቃድር፡ እብ ክሱስ መትነዛም ወነሻጣት መሕበር እተ አቅሊም ሚ ከም መሰል፡ ለወዳናህን ምስሉ መቃበለት 1^ይ ክፋለ እንቀድም እግልክም፡ ቅራኣት በኪተት።

ሰኣል፡ መትነዛም ወነሻጣት መሕበር እት አቅሊም ግብለት ቢሐር ቀየሕ ሚ መሰል? እተ ልብል ሱኣል፤

በሊሱ፡ አወል ወቀደም ክሉ እለ መቃለበት እግል ቲደው ምስልይ እብ መትሐሳርክም እብ ሰሜቹ ወሰሜት ክሉም አዕደእ መሕበር እግል ሐምደክም እፈቲ። አቅሊም ግብለት ቢሐር ቀየሕ፡ ምነ ፈይሐ አቃሊም ዐድና ቱ፡ ፍንቱይ ለወድዩ ህይ ምስል መትፈንጣር ሸዕቡ። ምስል እሊ ሀይኣት መዋሰሳት ክመለትሐዜ ኢንገይሰኒ። ሸባብ ናይ እሊ አቅሊም ዲብ ጸቢብ ወፋይሕ መትነዛም እንዴ ትካፈለው ንዘማምቶም። ዲብ አቅሊም፡ 16 ሙዴርያት አፍሪዐት ናይ አብያት መዳርስ ሀለዩ እንነ። እተ ከም ሰልሁመ 21 መትናዛም እብ እዳረት ደዋይሕ ሀለዩ። ወ21 መጃዕ መሰኒት ሸባባት ህለው፡ እ'ሎም፡ እሎም እንቤ እት ክሉ ለአቅሊም እንዴ ትፈጠረው ነሽጣቶም እብ ዋጅብ ልትጋይሶ። ሰበት እሊ ነሻዋ ናይ መሕበር እት አርበዕ ሙዴርያት እብ ራትዐት ገበይ ነሽጦም ገጽ ቀደም ከም ገይሰ ወዳ። እብ ደረጀት ወጠን ልግበእ ወእብ አቅሊም እብ ብዝሒ ዲብን ለትጋየሱ።

ዶር አዋልድ አንሳት፡ እት ዕምር ሸበት ለህለዩ መትነዛምን ሚመሰል እተልብል ሱኣል እትበልሰ፤

እሊ ሰኣል እሊ ኦሮት ምነ እት መትነዛምን ከም መሻክል ለልትረኡ ወክል መረት ለእናቅሸ እቱ ምህም አርእሰ ቱ። ዲብ እሊ አቅሊም፡ መሻረከት ናይ አዋልድ አንሳት፡ ድዲፈት ጸንሐት እሊ እግል አትሐሰሰዮት ምን ወቅት ዲብ ወቅት ልትሸቁ እሉ ጸንሐ ወሀለ። እብ ደረጃት እንዴ ከፈልነ ዶል እንርእዩ፡ ዲብ አወላይት ደረጀት መሻረከት አንሳት ደሐን ተ እግል ኒበል እንቀድር። ላኪን ሕነ ምን ምግባይት ደረጀት እንዴ አንበትን እንጽብጡ፤ እግል መሰል ምን ዕምር 14 አስክ 40 ሰነት ለህላቱ ዲብ ነዞምት ለነኣትዩ። ልግበእመ ድኢኮን ዲብ ምግባይት ደረጀት ወካልእ

ደረጀት ብዙሕ መሻክል ሳድፍ ዐሊ። እሊ እግል ሀወኖት ወገበዩ እግል ልጽበዋ ምስልነ ለሸቁ እትጀሃት፡ ውዛረት ታዕሊም፡ ውዛረት እዕላም፡ ውዛረት ዓፍየት፡ ጀብህት፡ መሕበር አዋልድ አንሳት፡ ወለትፈናትው አሸካሪ ምስሎም እንዴ ትፋሀምነ፡ ተዕቢኣት፡ ወአሳጅያት ገቢእ ጸንሐ ወእስክ እላመ ሀለ። እንሸቁ እቡ ለጸንሐነ ተሰቂፍ ሰያሲ፡ እት አትፈዝያት አዋልድ አንሳት ለአትርገዛ፡ መሰለን ዲብ 8ይ ፈሰል ደረጀት ሰኔት ለአምጸየ መትናየቲ ልትሀየበን ጸንሐ። እተ እሉ እንሸቁ ነሻጣት ተረት አዋልድ አንሳት ምእታይት እንዴ ሀብህ እንሸቁ። ገሌ ምኑ ዲብ እትሓድ ሸባብ፡ እብ ደረጃት እንዴ ካፈልነ እነዝመን። ዲብ ምግባይት ደረጀት 1 ፍርቀት ቀይሒት ዕንባብ ህለው፡ ሐቆህ 2 ፊተውራራ፡ 3 ሕመረት፡ 4 ካድር እንብል ከዲብ እሊ መሻረከት አዋልድ አንሳት እግል ትተኣከድ ወደማን ትርኩብ ወእግል ተሀሌ እብደረጀት ደረጀት ብዙሕ ጅህድ እንወዴ ዐልነ ወሀሌነ። ወእብ ፈንቱይ እግል አዋልድ አንሳት፡ ለተኣትሐዝዮን፡ ሰዳይት ምስል መሕበር ወጠን አዋልድ አንሳት ወእንሸረሐን ለዐልነ ውዛራት ወመሰሳት፡ ምስል እንዴ አምሐበርነ፡ ለመሻክል ሚቱ ለዲብ አዋልድ አንሳት ለለሐሰል እግል አመሮት ብዙሕ ብሐሳት ወድራሰት እንወዴ ወሐል ከም ረክብ እንወዴ። ለመሻክል አው ለአሰባብ ዶል እንፈርግ እብ ገበይ ተዕቢኣት እንዴ ወዴነ ለትፈናተ ሰዳይት ከም ጉብእ በርናምጃት ነኣፈግር፡ ገሌ ምነ ታዕቢኣት ወእብ ነቲጀት ሰኔት ለፈገርን ምኑ ሐቆመ ሀለ እት ክሉ ለአቅሊም ከም መሰል ሰኔት እንዴ ወዳናህን ድራሰት ነሀይብ እበን እሊ በህሌት ከም መሰል ሰኔት እንዴ እንቤ ለእቱ ተዕወትየ መጀላት እንዴ ነኣርኤ ወነሰምዕ 'ግለ አዳም እብ ሐድ ሐድ ነኣፍህሙ ወእብሊ ህይ ለሒሰ ነቲጀት ራክባም ህሌነ። ለኪን እሊ እብል ዲብ ሀለኮ ሰኒ ህሌነ ሸቅልነ ንሕደግ ለበህለት ኢኮኒ። ዝያድ ዐቦት እግል

መትነዛም ወወቀይ መወሸደኤ አቅሊም ግ/ብሐር ቀየሕ



ነርኤ ወነቲጀት ዐባይ እግል ንርኩብ አዜመ ዝያድ ምህሮትን እግል ንሰደድ ብዙሕ ሸቅል ለጸበረን ከም ሀለ ኢመትረሰያት ከምቱ እግል አትፋቅድ እፈቲ። እግል መሰል ሕነ ለእንሸቅዩ እብ ደረጀት ደዋይሕ አው አቅሊም እኮኒ፡ ክሉ ሸቅልነ እብ ደረጀት ወጠን ወዐለም ሰበት ገበኦ፡ እብ ቅድረትን እግል ንእመን ህሌት እንነ። አዜ ሕነ አዋልድ አንሳት እብ ዴራይ ዓዳት መደረት እግል ኢትሕሰል ዲብን ዝያድ እብ ሐሌት ወደቅብ ተዕቢኣት እንወዴ። እግል መሰል 1) ክሸቦ፡ 2)ህዳይ ምተሐት ዕምር፡ 3)ሐዲግ መድረሰት ወለ መሰሉ ወዓመተን እት ዓፍየተን መደረት ለወዴ ወጭቁጣት ለወዴ አሸዩእ ዝዩድ ክሉ ሕነ መራቀብት እንወዴ። እሊ ህይ መሕበር እብ በይኑ ኢኮን። ምስል ዲብ ለዐል ለሰሜዝወን ውዛረት፡ ጀብህት፡ መሓብር፡ ወገሌ አሸካሪ መሳኒት መሕበር ልግበኦ ወሰብ ገጽ ወሕሹማም ህግያህም ለትሰመዕ ምስሎም ነተፍቅ በህሌት ቱ። ወእብሊ ለትፈናተ ነሻጣት ነትጋይሶ፡ እግል መሰል መዕሊማት ዓም፡ አሸዓር፡ ተማሲል፡ መክሐዳ፡ ወንቃሽ እትመዳርስ እብል ትፈናተ መጃልት እንወዴ እግልን።

እተ እሉ ትወዱ ተዕቢኣት አው አትፋዝያት፡ ሸዑብ ከኣፎ ልትከቡቱኩም?

በሊሱ፡ ጡብዐን እሊ አቅሊም ምስል ብዝሓት ድወል ልትሐደድ፡ መሰለን የመን፡ ጅቡቲ፡ አቶብዩ፡ ወእብጀህት ብዕደትመ ምስል ብዝሓም አቃሊም ዐድነ ልትሓደድ፡ ከለ ዓዳት ናየ ትፈናተ ድወል ወአቃሊም፡ ምንመ ጉብኦ፡ ሸባባትን እብዓዳት ወላድ ጋነ ኢልትመረሐኒ። ዓዳቶም ወሰዋልፋም እት ለዐ'ቅቦ ሰበት ገይሶ እትነፈሰነ ደማነት ብነ። ወሕነ እብመጅብ እሊ ለሸባባትን ምስል አቃሊም ብዕድ ከም ልትአመሮ እንወዴ፡ እሊህይ

እብገበይ ርሕላት እተ አቃሊም ጀውላት ነኣወድዮም በህሌት ቱ። አበል እሊመ እብ መዐወነት መሕበር ወጠን ሸባባት ወደረሰ ኤርትራየ፡ ወውዛረት እዕላም ለጉብእ በርናምጃት ትልፍዝዮን ወጀራድ እንወዴ፡ እሊ ህይ ቀዳያት ሸባብ፡ ወለ ነፈም ወኢነፈም እግል አመሮት እንዴ ትበህለቱ ለጉብእ። ክመ ክሉ ለአምረ እሊ መጅተመዕ እሊ ቀደም ሕረየት ብዙሕ አብካት ታዕሊም ኢዐለ እግሉኒ፡ ምን ሕርየት ገጽ ሐር ለኪን፡ መጃል ታዕሊም፡ ዓፍየት፡ ወለፈናተ ከደማት እጅትማዕየት አስክ ረዩም ብሩር እት ክሉ ወጠን ትመደዳ። ወእብ ፍንቱይ በክት ታዕሊም ወዓፍየት እንዴ ፈይሕ ወሰኔ ሰበት መጸኦ ሸባባትን እተ ወቀለት ደረጀት በጽሓም ልትረከቦ ህለው። ለትፈናተ ሙእተመራት፡ ወወዕላታት ገዩሱ ህቱ ህይ እብ ውዛረት ታዕሊም፡ እብመሕበር ወጠን አዋልድ አንሳት፡ እብ ሸቢበት፡ ወእብ ብዕዳት መኣሰሳትመ ለጉብእ ህለ። ፈገሪት ናይ እሊ ህይ አስክ ደረጀት ክሉያት ለበጽሐየ ዳርሰት አዋልድ አንሳት ረክባም ህሌነ። ወዲብል ፈናተ መኣሰሳት ሐኩመት ለሸቅዩ አው ለሸቁ ሕዳም እኮን። እሊ ህይ ፈገሪት ናይ እሊ እንብል ለጸንሐነ አብካት ታዕሊም ምን ረከባ ቱ።

መድረሰት እንዴ አትካረመው እት በረ ምን ታዕሊም ለህሌው መንደሊታት እብ ጀህት መሕበር ሚ ኡብካሸት ልትሀየቦም?

እሊ ሰኣል እሊ ምነ ምህም ወለ እንሸቁ እቱ ወእንናቅሸቱ ለህሌነ መጃላት ቱ። እግል እንዴ ደርሰው ቀደም ለኢገሰው፡ ከም በርናምጅ እንዴ ጸበዋናህ ከሕፍዝ ወዴነ ቱ። ከህቶም እብል ትወቀለት ገበይ እት ሐንቱ መሕበር እንዴ ትከምከመው አብካት ናይ ታዕሊም ወእብ ፍንቱይ በክት ናይ ምህነት እግል ልትሀየቦም ወዴነ ወኦርት ምኑ፡ ህይ ተእሂል ኔት ዓሰ ከኣፎ ከም ገፎ፡ ወለ ኔት ሐቆ አኬት

ከፎ ከም ለአሰንዋ ውበዕድ መጀላት አድረስናሆም። እግል አዋልድመ፡ ግድሉ፡ ተሰዊር፡ ወአዜመ፡ እብ ክሱስ አርዛቅ ዐድነ ወመትነፈያቱ፡ ለከሰስ ተእሂል ልትሀይብ ዐለ። ምን እሊ ሐቆ አትመመው፡ ሰልፊየት ትትሀየቦም። ለተሰሊፈት ለኪን አግቡይ በ። ሰልፍ ድራሰት ልትሀየቦ፡ ከሐቆህ ነስኦዋ እንዴ ሸቀው እት ቀበት ክልኤ ሰነት ደፍዕዎ። ወለ ዮም በክት ምንመ ኢረክቦ፡ ሰበት ደርሰወ ሸሃደት ናይ ሐንገል ሰበት ገበኦት 'ግል ሓሪት ነፈም። እሊ ሌጠ እንዴ ኢጉብኦ፡ ሸባባትን ድረሰት 'ግል ልሕደን አለቦም እንብል። ልግብእመ እኮን ደረሳይ ክሉ ክሉ ድራሰቱ እግል ልሕደግ አለቡኒ። ሕነ እግል ግድዓም ወመሳኪን ሸባባት ሰዳይት እንወዴ ቀደም ክሉ ላኪን ኦሮት ደረሳይ መድረሰት ለሕድገ እቡ ሰብ አመሮት አሀመ ሸእ ቱ። ሐቆ እሊ ከም ስቲሸኔሪ በህሌት ከራሰት ወአቀልም፡ ተሰጂል እብከፎ ገበይ ከም ልደፊዕ ምስል ከሰሰ ጀህት ንትፋሀም ወከም ደርሶ እንወዴ። ሐቆ እሊ ክሉ ሰዳይት ወዴነ እሉ፡ እንዴ ኦቲነሁ ሕሳሉ ኢነርሄ እግሉ ከፎ ደርሰ ከም ሀለ እንታብዑ፡ ምስል መደርሲን ዕላቀቱ ከፎ ከም ህሌት፡ ሕነ ሰዳይት ወዴነ ለደረሳይ ህይ እግልነ ሚሰኔት ፈዴነ እግል ንተኣከድ ብነ። ምን እሊ ደረሳይ እሊ ለንጸበረ ምን ተሀሌ ሰብር ወከሃለት እንዴ ደቅበ እብ ነቲጀት ሰኔት ዶል ፈግርቱ። ኦሮት ጃንብ ናይ ሰዳይት እግል አዋልድ አንሳት ለጉብእ ሀለ፡ እግል መድረሰተን እብ ሰበት ህዳይ ወውላድ እትኩሩማት ለዐየ፡ ዲብ ድራሰተን ከም ለአቀብለ እንወዴ ወእብሊ እንዴ ዋሰለየ ደረጀት ሰኔት ናይ ታዕሊም ለበጽሐየ ህለዩ። ከእብሊ ለእሉ እንወዴ ተዕቢኣት ደሚርን ርዮሕ ቱ።

እብ መሕበር ወጠን ሸባባት ወደረሰ ኤርትራየ ለትነዳሌ ሰፍሐት

ልግብ

ዎርት ገርሀት ናይ አፍሩስ በህለት አፍሩስ ለለአትባዜሕ ወለዓቤ እተ ለመልክ ዐለ እግልዬ። ሐቲ ዶል ቤቱ ክም ዓማት እት መስለሐት ሸባባት ለልውዕል ማል እግል እትነፈዕ እበ እት እዳዬ ካርሀ ዐለ።

ናይ ደንጎበ እተ ኣካን ለመጸኦ እቲ ወቅት ክምእነ እት ልብል ተኣመሬኒ፤ “ኣነ እግል ጃክ ለቤቼ እግልሚ እግል ልትነፈዕ እበ ሁብክዉተ ግል እዳግም እግልኩ። ለመስኦለት ከልፍየተ እት ዎርት ኣቡሁ ምን ኣካን እት ኣካን እት ነክስ አፍሩስ ለአትለቤ ለዐለ መንደላይ ተኣቀብል። ህቲ ምን ኣካን እት ኣካን፤ ወምን ብድረራታት እት ብድረታት፤ ወምን ገርሀት እት ገርሀት እት ለአንጎን አፍሩስ ለአትለቤ ነብረ። ከክም ፍገራት ናይ እሊ ተሐት ወለዐል ለአተንጎግዩ ለዐለ ሸቅል፡ ለጀናሁ (እሊ ለእሉ እንብል ህሌነ መንደላይ) ለናይ ሳኑወየት ድራሰቱ ዶል ከለአትካርመ ነብረ። ሐር ዐቢ ክም ጉብኣ ለናይ ተክሪጅ ወረቀቱ እግል ልክተብ፡ ሐር ክም ዐበ ሚ እግል ሊዴ ወሚ እግል ልግበእ ክም ልትሸጎህ እበ ከስስ እግል ለአአትዳልየ ውልክተብ ትጠለበ ምኑ።”

ለላሊ ለህ ሰዐዕ ገጽ ለትከምክም ወረቀት ከትቤ፡ እግለ ሐቲ ምዕል አፍሩስ እግል ልምለክ ካርሁ ለዐለ ሀደፍ ዲብለ ክቱቡ ኣክል ሕድ ሸርሐዩ። እብ ክሱስ እሊ ሕልሙ ተማም እንዴ ፈሰለዩ ከትብዩ፤ ወኣስክ ከሪጠት ናይለ 200 ፈዳን ለትከምክም ገርሀቱ እንዴ ረሰመ፡ ለመባኒ ለእተ ቀብተ ህለ ለልትረኩብ እቲ ኣካናት እንዴ ኢተርፍ ኣርኦ ወተማም ሸርሐዩ። ሐቆ እሊመ ለ400 ምትር መረበዕ ለትከምክም እተ ቀብትለ ናይ 200 ፈዳን ናይለ ሕልም ገርሀቱ ለዐለት ዐማረት ረሰመ።

እሊ ናይ ሕልም መሸሩቡ ኣክል ሕድ ልብ እንዴ ከረ እቲ ክም ሸቀዩ፡ ፈጅሪተ ለወረቀት ነስኣየ ወእግለ ምደርሱ ሰለመዩ። ክልኤ ምዕል ክም ኣላፈዩ ለወረቀቱ እበ ኣስረ ኣቅበለቲ። እተ ሰልፋይት ሰፍሐት እብ ቀለም ቀዩሕ ለትክተብት “F” ዐለ እተ፡ ወምስሉመ እሊ ተሌ ሐብሬ ኣቅፈት ዐለት፤ “ለ ሕስትለ ድራሰት ክም ተመት እንዴ መጸእክ ርከበኒ።”

ለጀነ ምስለ ሕልሙ ለሕሰት ክም ተመት ኣስክለ እስታዙ እንዴ ጌሰ፤ “እብ ሚ ሰቡብ ቱ ኣነ F ለነስኦኩ? እት ልብል ሰኣሉ ቀደመ እቲ።

ለኡሰታዙ ህዩ፤ “እሊ እሉ ሕሉም ህሌክ ሕልም፡ ምስል ወሮት ክምእነ ክምሰሌክ ሻብ ለኢገደሰ ምን ኣማን ለሬመ ሕልም ቲ። እንተ ማል ኣሉብኩ፤ ወምን ሐቲ ተሐት ወለዐል ለተኣንጎን ዓይለት ማጽእ እንተ፡ ወእግል እሊ እሉ ትብል ህሌክ ሕልም ለጉብእ ድሕረትመ ኣሉብኩ፤ ሐሬ ናይ አፍሩስ ገርሀት እግል ትምለክ ጉብኣክ ምን ጉብእ ቅደስ ለኣለቡ ማል ለአትሕዜክ። ምድር እግል ትትዛቤ ለአትሕዜክ፤ እግለ ተርብዩትለ አፍሩስ ለጉብእ እግልክ መክዘን ወብዕድ ብዞሕ ማል እግል ትድፈዕ ለአትሕዜክ። ክምስልሁመ ዎርት ሰኒ ዐቢ ላቱ ክራም ናይ ብድረ አፍሩስ እግል ትተውብ ብዞሕ ማል እግል ትድፈዕ ቲ። ወእሊ እግል ቲዴ ህዩ ለልትቀደር ጋር ኢኮን እንዴ ቤለዩ። እለ ወረቀትክ ምን ሐዲስ ለሀደፍክ እት ኣማን እንዴ ኣተንኩብካሁ ዶል ትሸቅየ ለንቃጥክ ምን ሐዲስ እት ወግም እግል ኣትዩንቱ ቤለዩ።

ለጀነ ቤት እንዴ ኣቅበለ እብ ክሱሰለ ጋር ብዞሕ ሐስበ ወኣስተንተኑ፤ ወዲብ ኣቡሁ እንዴ ጌሰ ሚ እግል ሊዴ ክም ብእቱ ሾረት ጠልቤ። ኣቡሁ ህዩ፤ ሰመዕ ወልዩ፡ እሊ ጋር እሊ ኖስክ እንዴ ሐሰብክ እቲ እበ ተሐይሰ ለትብለ ጉብይ እግል ትክደሙ ብእትኩ። ክመ ልትረኣየኒ እሊ ሰኒ ምህም ላቱ እከ ሌጠ ለክሰስ ቀራር ቱ ቤለዩ። ሐቆ እለ ለጀነ መደት ሐቲ ሳምን ለትጉብእ ወቅት ክም ኣላፈ፡ ለወረቀት ወለ ሐቲ እንዴ ኢበድል እተ እበ ኣካነ ነስኣየ ወእግለ ኡሰታዙ ሰለመዩ። ወክምእነ ቤለዩ፤ “እንተ እተ እሉ ሁብከኒ F ተረድ፡ ወኣናመ ለሕልምዬ ይእጠልቁ ሰኒ ሌጠ እግል እተረድ እቲ ቅሩር ህሌኮ” ቤለዩ።

ሐቆ እለ እተ ጅሙዕ ለዐለ ኦዳም እንዴ ትወለቤ፤ “እለ ድግም እዳግም እበ እኩም ለህሌኮ ምስምሰ፡ እንቱም እተ ናይ 400 ምትር ምረበዕ ለትጉብእ ቤትዬ፤ ወእት ቀብትለ 200 ፈዳን ለትጉብእ ገርሀትዬ ለህሌት ቤትዬ እኩባም ሰበት ህሌኩም ቱ ቤለዮም፤ ወለ F ለተህዩቤኒ እተ ወረቀት ድራሰትዬ፤ እት ብርዋዝ እንዴ በርወዝክወ ኣስክ እለ ዮም እተ ሳሉንዬ ተህንጦጥል ህሌት ቤለዮም።

ከእንዴ ኣትለ፤ “ለሔስ ክፋል ናይ እለ ድግም፡ ቀደም ክልኤ ሰነት ጉብእ፡ ዎርት ምድርሱ፤ እተ ባክለ ገርሀትዬ ዲብ ዎርት መዐስከር 30 ለጉብእ ደረሰ እግል መደት ሳምን እምጽእ ዐለ። ሐር ለምደርስ ሸቅሉ እንዴ ኣትመመ ክም ጌሰ፡ ለምደርሰዬ ሰመዕ እንዴ ቤለኒ፤ “እለ ዮም እደግመ እግልክ ህሌኩ፤ እተ ኢዩም ለምደርስክ ዐልኮተ፡ ሐት ሐቲ ዶል ናይለ ደረሰ ኣላም እሰርቅ ዐልኮ። ወእተ ሰፍታት ለህይ ናይ ብዝኣም ደርሰ ኣላም ሰረቅኮ። ለበክትክ ለሰኒ፡ እንተ ሰእየት ለኢተኣበትክ ድቅብት ሸንሀት ዐለት እግልክ ከእባቱ ለሕልምክ ኢትሰረቅክ ቤለኒ።

“ለጉብኣ ነፈር ሕልምክ እግል ልሰረቅ ምንክ በክት ኢተሀቡ፡ ልብክ ለልብለካተ ሌጠ ውዴ፤ ወለእለ ጉብኣት ትግበእ ኣሰሩ ሌጠ ጉብእ።”

መዕለ-መት

- ሪም ንሳል ዘራፈት ሐድ 45 ሰንቲ ምትር በጹሕ።

ኣትለበዮት ምክ (ባል)

ኣይወ! እብ ተሕዲድ ምክ እንዴ ኣትለቤካሁ፡ ካሪ ልብክ እግል ተኣትኣይሱ ትቀድር። ኒበል እንተ እት ተማሪን ዮጋ ትትላመድ ጉብኣክ ምን ጉብእ፡ ሐዳይ ዳወጥት ዲብ ተማሪን ዮጋ እግል ካሪ ልብክ እት ለሔሰት ደረጃት ክም ለኣትኣይሱ እግል ተኣምር ቲ። ወእተ ክምስልሁመ መትፈካር ወመትኣማል እግለ ነፈር ካሪ ልቡ ዝያደ እግል ልትወቀል ወልዕቤ ሰዳይት ወዴ እሉ።

መትኣማል ወመትፈካር እግል ውላድ ኣደሚ ካሪ ልብ እግል ለህሌ እሉም ዐባይ መንፈዐት ለሀይዖም፤ ወካሪ ልቦም እብ ውቅልት ደረጃት ክም ወስክ ወዴ። ከሀናት ናይ ቡድየት እት ተፍኪር ወመትኣማል እት ክል ምዕል ለዳውውሞ፡ ክል ዶል እተ ልትሀዩም ናይ ካሪ ልብ

ወተርኪዚ እምትኣናት ለሔሰት ነቲጀት ክም ረክቦ ቀደም እለ ለጉብኣየ ድራሳት ክም ለኣክዳሁ ተኣምር ጉብእ? ምናተ እሊ እት ሰልፍ ዝኩር ለህለ ኣግቡይ፡ እግል ራሐት ነፍሰ ለከድም ሐቆ ኢጉብእ፡ ብዕድ እግሉ ለመሰል ናይ ካሪ ባል ወተርኪዝ ተማሪን ውዴ። ዩም ኣለቦም እግል እሊ ጋር እሊ ለጉብኣ እት መንፈዐትክ እግል ተኣውዕሎም ለትቀድር ዓማት እት ሸበኩት እንተርኔት እግል ትርኩብ ትቀድር። ምናተ እንሰር ሐዳም ጋራት ህለው እሎም እንዴ ወዴክ እግል ተኣንብት ለትቀድር፤

ለጉብኣ ክታብ እንዴ ሀረሰኩ፡ ከዲብ ሐቲ ምነ ጦጉ (ፐረግራፍ) ለህለየ ዛፖታት ዐልብ። ሐቆህ ዲብለ ምረሐሬህ ለህሌት ጦግ እንዴ ተዐዲኩ ምን ሐዲስ ዲበ ለህለ

ዛፖታት ዐልብ። እግል እሊ እብለ ትመሰል ገበይ እንዴ ደጋገምካሁ ለጋር ኣስክመ እት ቀበት ሐቲ ኣውመ ክልኤ ሰፍሐት ለህለየ ዛፖታት ተኣተምም ኣተላልዩ። እሊ ተምሪን እሊ ምዕል ምዕል ዶል ተኣተላልዩ፤ እግለ ካሪ ልብክ ወለህለ እግልክ ተርኪዝ ክም ወስክ እግል ሊደዩ ቲ። እብ ክሱስ ገሌ ናይ እልሃም ዛፖታት ክም “ኣም (om)” ለመሰል ሕሰብ፡ ወእግል መደት ሐምስ ደቂቀት ባልክ ክሬ ዲቦም። እሊ ጋር እሊ ኣስክመ እንተ ባልክ ክሉ እትሎም ዛፖታት ኣውመ እትለ ኣክራናቶም ካሪሁ ክም ህሌክ ልትኣመረክ ኣተላልዩ። ወምን እሊ ወኬን እንዴ ሐለፍክ እግል መደት ዐስር ደቂቀት ልብክ እንዴ ከሬክ ክም ትጸኔሕ ጀራርብ።

በህል እ'መራም

ሳቆረስ (ወድ ክሪክ ላቱ ፍላሰፊ ወዓልም ሕሳብ ቱ)

ከእሊ ተሌ ገሌ ምን መባልሱ ቱ

- ወ ክብድትመ ትምሰል እንዴኢኮን፡ ክል ዶል ህተ ተሐይሰ ለትመሰል ገበይ እለ ሕሬ፡ ሐቆ ገሌ ወቅት ትለመደት ምን ጉብእ ቀላል ወክሉ ለልትከበተ እግል ትግበእ ቲ።
- ቀዋኒን እግል ውላድ ኣደሚ ላዝም ደሩርየት ሐቆ ትጉብእ፡ እተ ወቅት ለህይ ህቶም ኣሕራር እግል ልግብኣ ሐቲመ ሰላሕ ኣለቦም።
- ለጉብኣ ቀሊል ጋር ወላ ምን ጉብእመ፡ መጅቡር እት እንተ ዶል ትትፈረር እቲ ለደቀበ ጉብእ።
- እት ዶል ሐሩቀት ምን ሂገ ወውዳይ እግል ንእዘም ወጅቡ።
- እብ ክሱስ ብዝኣም ጋራት ሐዳይ ኢትትሃጌ፡ እብ ክሱስ ሐዳም ጋራት ብዞሕ ተሃጌ።
- ሐሩቀት መኣንበተ መግለል ቱ ወደንጎባህ ትዕስ ቲ።
- ኣዚም ምን ተርጀመት ለኣለበን ዛፖታት ልትፈደል።
- እግለ እሉ ትወዴ ሰዋብ ኣግኔዕ፡ ወሐቆህ ብዕዳም እብ ክሱስክ ለእለ ቤለው ሊበሎ እዝን ኢተሀቦም።
- ሀመት እት ተወሰ ሕኔት ትሸመነ ኣስክ ሸቅል እግል ትደርከን ንታኬ፡ ወርሑ እት ምልኩ ለኢትጉብእ ህዩ ሕር ኢኮን።
- ሸንሀት እት እንቡተት ፍዕል ለህሌት ፍክረትተ።
- ኣስክመ እብ ሐዮትዬ ህሌኮ ሞት ይህሌት፡ ወሞት መጸት ምን ጉብእ ህዩ ኣነ እብ ሕደዬ ይህሌኮ፡ ከእግል ሚቱ ኣነ እብ ሕደዬ ዲብ ኣነ እት ምልክዬ ለይህለ ጋር እቡ እትሻቀል።

ዝበድ ዛፖታት

ምን ዔብ ላጽሐት ላተ ዓይለት ክሉ ረኣሰ ይህሌት፡ ሕነ ክል ዶል ንትከሐድ፡ ሕድ ንትሄረር፡ ንትበኣስ ወእግል ዶሉ እት ሕድ ቅልብ እንጉብእ፡ ምናተ እት ደንጎበ ዐይለት ዐይለት ሰበት ቱ፡ ለመራሐመት ወፈታለ ሕድ ላተ ክል ዶል እተ ኣካነን ሀለዩ።





ተብሰም

ሐቲ ጀማዐት ጀኔታይ ንኡሽ

እግል ለኣዝብዉ እት ዕዳጋ ጌሰው እቡ። ሐር እተ ዕዳገ ዎርት ነፈር ዶል ረኣዩ እግል ልትዛበዩ ቅርብ ቤለዮም ወክመ ንዋይ ተማተመዩ ወሰኒ ትፋጠነዩ ከእስክለ ጀማዐት ለለኣዙብዎ ዐለው እንዴ ትወለቤ ምን ዔብ ገሌ ሚ ብዴቡ? ቤዮም። ህቶም ህዩ፤ እተ ንጻፋ ሸይን እንዴኢኮን፡ ካልእ ዔብ ሓቲመ ኣለቡ ቤለው። ህቱ ህዩ፤ እለ ሐቆ ጉብኣት ደሐን ቱ፤ እለ ምዶል ዔብ ጉብኣት፡ በዲሩ ንጻፍ ልርኩብ እንዴኢኮን፡ ንጻፍ ረክበ ምን ጉብእ ላተ ደሐንቱ ሊሺን እቲ እኩም ቤለዮም ወእግለ ሕጻን ትዛበዩ።



ምን ውራቅ በሐሰ እግል ዐቦት ትግራይት

3^ይ ክፈል

ዲበ ሐልፈ. ክልኦት ዓሙድ ዓዳት ወፈን፡ እብ ሰበትለ ዲብ ሰነት 1984 ዲብ አሰመረ ለጉብአ መሕበር ጎማት እግል ዐቦት ትግራይት ርእያም ዐልነ። ትግራይት ክምሰለ ክሊነ ነኦምሩ፤ እት ፋይሕ ምድር ኤረትርየ ወምፍጋር ጸሓይ ሱዳን ለትሸረት እት ገብኤ፡ እብ ደደዋይሑ ለትፈናተ ለህጃት አው ዝዖታት ለልትነፈያ ህለው። እግል መሰል በርኩ ሳሕል ወሰምሀር ክምሰልሁመ ባጽዕ ወአፍተ ዙለ ረኡነ ምንጉብኤ፡ ምን ዘበን ቅዱም ልትነፈያ እቡ ለዐለው ከሊማት ህለ። እሊ ከሊማት እሊ ህዬ እግል ትግራይት ዐቢ ርዝቅ አው ክብት ቲ።

እሊ ምን ዘበን ቅዱም ለጸንሐ ከሊማት ትግራይት የም ምሰለ እብ መናጅህ ለልጠበዕ አክትብት ትግራይት ዲብ ሕድ እት ቀርብ ገይሰ ምንመ ለህሌ። ለበዲር ዐለ አመርት ወሐዲሰ ጠወርት ህዬ መሰኡልየት ክል ነፈር ገብኤ። ከእትሊ ናይ የምመ እብ ሰበትለ እት ዘበን ቅዱም ለትከተበ አክትብት ወዲብ ለትፈናተ ደዋይሕ ለልትህደግ ከሊማት እግል ንርኤቲ።

እግል መሰል ምነ ገዲም ከሊማት ትግራይት ረኡነ ምንጉብኤ ዲበ እት ሸኘዋ 1984 ለጠበዕ ውራቅ በሐሰ እብ ክሰሱ ከሊማት ውሓባር ክእነ ክቲብ ህለ፡ -

ሕኔት ርሒብ ፋይሕ
ሰርሰዐር አክደር
አሰፈር ሐመልሚል
ልብሎ ዐለው።

ናይ አትግዝሑት
ልባሰ = አልባሰ
ኒብ = አይናብ አው አንድብ
ሰገን = ሰገኖ አው አሰጉን፤

እብ ክሰሱ ሕሳብ እብ ትግራይት ባጽዕ እንዴ ቤለ ህዬ፡
 -
እግል ሐቲ = ሐንቲ
እግል ሰሰ = ሱኡሰ
እግል ዐስርሐቲ = ዐስር ወሐንቲ
እግል ዕስረ = ዕሸሪን
እግል ሰላሰ = ተላቲን
“አርበዐ = አርብዒን
“ ሕምሰ = ከምሲን፡
ሱቲን፡ ሱባዒን፡ ተማኒን፡ ትሰዒን፡
ምዩ፡ አልፍ፡..... እት ልብሎ
ክምሰል ለሐሰቦ፡ እሊ ህዬ ምን
ቀደም አምኣት ሰኒን ለዐለ ሕሳብ
ሱብ ባጽዕ ክምቲ ተኣከድን፡

ብዕድ ተርቲብ ትግራይት

ምሰል ተርቲብ እንግሊዚ እብ ክእነ ለጸብጡ፤

the 1st = ቀዳም
 “ 2nd = ካልኣይ
 “ 3rd = ሳልሰ
 “ 4th = ራብዕ
 “ 5th = ሓምሰ
 “ 6th = ሳድሰ
 “ 7th = ሳብዕ
 “ 8th = ሳምን
 “ 9th = ታሰዕ
 “ 10th = ዓስር እት ልብሎ ለሐሰቦ፤

ብዕድ አምበል እሊመ እግል ዕሽር እብ ክእነ ገበይ ለሐሰቦ ዐለው።

1/6 = ሳድሰ (ሐቲ ምን ሰሰ አው ሐቲ ሰድሲት)
 1/5 = ሓምሲ..... ዲብ ትብል ተሐሰብ

አምበል እሊ-መ ወቀት እብለከሰሰ ትግራይት ክምሰል ናይ እንግሊዚ ትትነፈዕ፡ እግል መሰል፡- three times = ሰልኣሰ ዶል ወለመሰሉ.....፤

እብ ክሰሱ ብዕድ ከሊማት ወእብ ፍንቲይ ዲብ ባጽዕ ልትነፈያ ኣቡ ለዐለው ዲብ ወዴሕ ህዬ፡
 - እታ ዘመን ለህይ እግል ጃርዲን ቡሰጣን ልትበህል ዐለ፤
 - a high house = ቤት ዕጉል
 - a strong horse = ፈረሰ ጽጉብ

ባጽዕ፡ ወደዋይሕ ዙለ ብዕድ፡ አካናት

ምሰሕ	ነብረ
ቀሊል	ረኪሰ
አሰብደ	አምበተ
ውዑይ	ሕፋን
ቀይእ	ጠርሽ
ሐመት	ሐዝ
ቀህወ	ቡን
ጭንድቅ	ለቤዕ
መኣሰ	ጅልድ
ዕደት	ኣላት
ዘመን	ወቅት
አንጃብ	አንዶብ
ካካይ	ቅወዕ
ዕርዶት	ሰጋድ
ሸግግት	ሸበክት
ርሐቅ	ረዩም
ነሃር	አምዕል ወለመሰሉ

አክትብት ትግራይት
 1. ለሳልፋይ እብ ሂጋ ትግራ ወእብ ሕሩፍ ግእዝ ለትከተበ ክታብ ላታ፡ ለዲብ ሰነት 1889 ለትከተበ ክታብ ዲን ክሰታን ቲ። እሊ ክታብ እሊ እብ ሕሩፍ ግእዝ ወሂጋ ትግራ

ለትከተበ እት ገብኤ፡ ለጠበዕ ዲብ ኣካን “እምክሉ” ለትትበህል ዲብ ደዋይሕ ባጽዕ ለህሌት መንጠቀት ቲ። እሊ ክታብ እሊ እብ መሕተም ሚሰዮን ለጠበዓ ቲ።

ምን አምሳላት ትግራይት

1. ደሐን ዲማ ተ ወብቆት ሐቲ አምዕል፡- እለ መሰል እለ ክል-ዶል ዲብ ደሐን ህሌኮ እንዴ ትቤ እግል ኢትትህመል ተኣትፋቅድኩ። ብቆት ናይ ሐቲ አምዕል ዲብ መደረት እግል ትክፈክክ ክምሰል ትቀድር ተኣፍህም።
2. ገመሉ በደ ሐንቲ ኮሩ ሐዘ፡- እለ መሰል እለ ዎሮ ነፈር ክም ተሐለለ ለኢትጉብኤ ጀርቤ ዶል ጀርብ ለትትመሰል መሰል ቲ።
3. ግሉል ዲብ ጽልመት ለአፋዝዝ፡- ዲብ ጽልመት ምን-መ ተኣፋዝዝ እግል ትትርኤ ወተኣፍርህ ኢትቀድር። ግሉል ላኪን እግል ልቃርን ኢቀድር። ለኢትጉብኤ ሓጃት ክምሰል ወዴ ምናተ ሴመ ክምሰል ኢልኣፈሬ ተሐብር።
4. ፈቲክ ህይበክ ሕድት ተ ነብረ ኢረኪብ ወኣቤክ ክልኣክ ክሉ ረኣሰክ እት ሸራብ፡- እለ መሰል እለ ፈታይክ ምን ሕድት-መ ክምሰል ለህይበክ፡ ህዶብ ህዬ እብ ምርወት ወኤማን እት ኢኮን እብ ረኪብ ወሕግላን ክምሰል ኢኮን፡ አባይክ ላኪን ርዝቅ እት እንቲ እንዴ ልርኤክ ረኣሰክ እግል ልሸረብ ክምሰል ክልኣክ ተኣፍህም።
5. አፍ እግል ክሉ ጨይሕ ወዕን ፈታዩ ትገንሕ፡- እለ መሰል እለ ፍቲ ምን ቀልብ ክምሰልቲ፡ ደለ እብ አፋሁ ትሰሐቀ እከ ፈታይክ ክምሰል ኢኮን። አፍ መጃመለት ክምሰል ወዴ ወቀልቡ ፈታዩ ሌጠ ክምሰል ገኤሕ እግል ትሸረሕ ለትትመሰል መሰል ቲ።

ምን ገጽ 5 ለኣተላለ

ምሰል እሊ እብለ ልትጸበዋ፡ ለሐልፈ ወሬሕ ለትከወነት ቤትጎማት ናይ ምሰል በሐር ቀየሕ ለልትሓደደ ድወል፡ ዶረ እት አምንለ በሐር ወመትሰዳዳይ ዐማር ናይለ ድወል ሚ መሰል? መሰከብት በሐር ቀየሕ ወባብ አልመንደብ እንብል ዲብ ሀሌነ ህዬ አህምዩቲ ወተእሲሩ አክልሚ ቲ? ለቀድያት እት ኖሰኖሱ ለህለ እሉ መተናኘብ(ኢንተርዲፕንደንስ) ፈጠንኳህ ምንጉብኤ፡ እት ኸለጅ ለህሌት ሓለት እግል በሐር ቀየሕ እብ ከኣፎ ተምትሙ፡ እት ቀር አፍራቀ ለህሌት ህዬ? እት ናይ በሐር ቀየሕ ለህለ ዕላቻት ዓመ (ፒ ኣር) አርእሰ ብዕድ ቲ። ሕነ እግል ፋሻት ወዘነት ለእንሸቅየ አሉብኩ። ምን ነባሪናመ ኢኮን። እሊ ልትበህል ለህለ ሕልፍ ወመቅሬሕ፡ አጃንዳት በሐር ቀየሕ፡ ናይ በሐርየት መትላማድ እት በሐር ቀየሕ፡ አምን በሐር፡ እድንዶይ መትሐላሰ፡ ማዶይ መትዐደዩ . . . ብዙሕቲ ለልትበህል። ምናተ ምን ዕላቃት ዓመ ለልሐልፍ ኢኮን። በሐር ቀየሕ እግል ኖሰ ምን እንርእየ ግብሊታይ እንክረ ወባብ አልመንደብ ህለ። እብ ገሌ መፋሂም ሶማል ኣይተት እቲ የዐለት። ባብ አልመንደብ እንዴ ትቤ እግል ትእዘም ኢትቀድርኒ፡ ኸለጅ ዐደን ሀለ። እሊ ጀልጅ እሊመ በይኑ ኢልትረኤ፡ 3300 ኪሎሜተር ሕጻጽ ማዶት ሶማል ሀለ። መሰከብት ሶማል፡ ሓለት ባብ አልመንደብ እግል ኸልጅ ዐደን እብ ከኣፎ ተምትሙ፡ እግል ክሉ እሊ ሱረት ዋድሐት ለተህይብ ሓለት እግል ንክለቅ እሉ ብኩ። ህዋይ ዕሙማይት እንዴ ትትሃጌ ለትሰናቄ እቲ ጋር ኢኮን። እብ ትብት ዲቡ እግል ንብጸሕ ገኣነ ምንጉብኤ፡ ዲብ እሊ ደዋሒ እሊ ለህለ ረዐድ፡ ሐናባቅ፡ ጀሬ ለህለ ደማር ወክየድ፡ ኣነ በርጠወ ቲ ለእብሎ።

እብ ሰሚት ባብ አልመንደብ ለኢልትሃጌ ኢህሉ፡ ኣላፍ ኪሎሜተራት እንዴ ተዐደ “ኣነ ዲብ ባብ አልመንደብ ሰላም እግል እምደድ” ቲ ለልብል እበዩ መቃይሰ? ወከም ደውለት ንትሐሰር እቡ ልብለ? ሕነ ላኪን ዋጅብ ናይ ቤትነ እግል ኒዴ ብኩ። ኖሰነ እግል ኒደዩ ለእንቀድር ኖሰነ ኒደዩ። እሊ አግዳም ከሊጅ ዐደን እብ ጀህት የመን፡ ጀህት ሶማል፡ ጅቡቲ፡

2. ዲብ ሰነት 1889 ለትከተበ ክታብ ህዬ እብ ክሰሱ ቀዋዕድ ትግራይት ቲ። እሊ ከሊማት እሊ ተርጀመቲ እብ ጀርመን ወመትመሳሳሉ ምሰል ዐረቢ ወዕብርየት (ኢብራይዋስ)

ለሸፊሕቲ። ምን እሊ እግል ንፍህሙ ለእንቀድር ትግራይት ምሰል ብዕድ ሀገጊ-መ ቅርብ ወምሰንዳት ክምሰል በ ለርኤን፡
ልተላሌ....

መቃበለት ርኢሰ...


ኤረትርየ፡ ሰዑድዮ፡ ሶዳን ዎሮ ፊህም እግል ለህሌቡ። በሐር ቀየሕ እብ ተማመ እግል ኒበል ይእንቀድር፡ የምክን ሐሬ እግል ነኣርሕብ እንቀድር። ኣዘ ላኪን እግል መሰከብትለ መንጠቀት ለልሐምርግ ተካምል እቅትሳድ ለለኣትሐውን፡ ለኢለትሐዘ ምን ቃትን ለፍግር አሸቃል ረዐድ ለለበጹሕ ፈርህታት ሚቲ? ሐቲ እብ ሐቲ እግል ልትበዩን ህሌት እሉ። ደቅቡ ወለሰብበ ብቆት እብ ሕፍዝ እግል ንኣምሩ ብኩ። እለ ብቆት እግል ንክረዕ፡ ክም ኢተህሌ እግል ኒዴ አውመ ዲብ መራቀብት እግል ነኣቲ ገብኣነ ምንጉብኤ፡ ለአርድዮት ከፎ ህሌት፡ ወሕነ ሚተ መቅደረትነ? እግል ትትአመር ህሌት እሉ። ለብቆት እግል ትክረዕ አው ትገልጽጽ ገኣክ ምን ገብኤ ሚ ለኣትሐዘ? መናዳቅ፡ መዳፊዕ፡ ድርናት፡ ማል፡ እብ ኣኪደት ሚ ለኣትሐዘ? እግል ልትአመር ህሌት እሉ። እለ ብቆት እለ አመርናህ ወፈሰርናህ ምንጉብኤ ህዬ፡ እግል ነኣምክነ አው እግል ነኣሪመ ምንእነ ሚ ምሰዳራት እግል ልትንሰእ ቀድር? እብ ተርቲቡ እግል ንክረዮ፡ ሐቆህ መቅደረትነ ሚተ ወኣርዛቅነ ከኣፎ እንከሰእ ወእንዝም እግል ንኣምር ብኩ።

ወእቲ እንዴ ተንኩብነ በራምጅነ እንዝዝም። እለ ኣሰክ ኢጉብኣት፡ እብ ህዋይ ዓመት ትገይሰ ኣለቡ። ከ”ንዕኖ ዕዙማም ሀሌኩም” ልበህል ዲብ ህሉ ለአግደ ምህም ዲብ ሃሳት ሻረኮት እንዴ ኢጉብኤ፡ ሚ እግል ልግበእ ቀድር እግል ነኣምር ብኩ። ወረቀትነ እላተ፡ ሰበት እሊ ዲቡ እግል ኒጊሰ እንቀድር ትበህሉ። ከእሊ ሕልፍ ልትበህል ለህለ መርሐለት መኣርድዮት ናይ ጎማት ሕድ ንሰኣት ምን ኢጉብኤ፡ ሕልፍ ጋብእ ህለ ኢልትበህል። አዳም ሐቲ ወክድ ምሰል ሰበት አጅተመዐ ሕልፍ ድወል በሐር ቀየሕ ተኣሰሰ እግል ኒበል ይእንቀድር። እተ ሕነ ሕልፍ አማን ለእንብሎ እግል ንኣቲ ገኣነ ምንጉብኤ፡ ሰልፍ ለጋራት ነኣብሸሉ፡ መፍህምነ ዲብ ሕድ ምን ይእንልሕጎመ ነኣትቃርነ፡ ከንትፋህም ሐቆህ ሚ ፈርህት ህሌት እንፈርግ፡ ለእንጃብህ እበ ገበይ ህዬ እንቀፍር። ዲብ እቅትሳድ ከፎ ንትሳዴ? እግል መዋጥኒን ውጢት ሓለት መንበሮ

እግል ነኣጥፊሕ ገኣነ ምንጉብኤ ሚ እግል ኒዴ ብኩ? አርዛቅነ ሚቲ? ሰኒ እንበይና። ፈረጎት ፈርህት ሌጠ ኢኮን፡ ህቲ ለመታክል እግል ትሸንክ ለትወድዮቲ።

ለዐበ ወኣሰክለ ሐሰት ለዋሌ፡ ዝሕርታትክ እንዴ ዝምክ ተካምል እንዴ አምጸኢክ ቀደም እግል ትሄርር ቀዲርቲ። እሊ እንዴ ኢተአበርህ ሕልፍ እግል ቲዴ ልትቀደር ምን ልብሎ፡ ሕነ እት ሃሳት ወዕላቻት ዓመ ኢነኣቲ። ዲቡ ኢነኣቲ እንዴ እንኪመ ኢንትጠርፊ። እትሰ መናሰበት እንዴ እንሻርክ ፍክረትነ እግል ንሸረሕ፡ ናይ ብዕዳም እግል ንሰመዕ ብኩ። ለቀደምናህ ወረቀት ህሌት፡ ምነ ዲብ ህለ ለሐሰ ረኣይ ብዬ ለልብል ምን ለህሌ ህዬ ልምጸእ ሌጠ እንብል። ሕነ ምን ብዕዳም እንዴ ሐሰነ ኢኮን፡ ምን ተጅርበትነ ለከእለልናሁ አፍካርቲ ለእሉ እንቀድም ህሌት። ለትሰረረተ “ቻይነ እንዴ መጽኣት እትሊ ባኮት መሰከብት እግል ትክለቅቲ” ቤሉኒ ምን ገብኤ፡ ቻይነ እብ ፈቲካህ ወኣቤካህ ኢኮን፡ ለሰኣል እብ ከኣፎ ተኣሰክበ? ቲ። ሐለት ሐቲ ምን ማርሰ እንዴ መጽኣት እግል ተኣሰክቡቲ ምን ልብሉኒመ እበዩ ገበይ? አፍህመኒቲ ለእብል። እፈትዮ ወኣብዮ ኢኮን ለሂገ። ለጸንሐ ነባሪ ዲብ እዕላም፡ ደዓያት ወዘነት ለልትባደር ሰበት ቲ። ምን እሊ እግል ንፍግር ህሌት ኣኩ። ለንዛምነ ሰልፍ እብ ገበይ ራትዐት እት ናይ አማን መትሰዳዳይ ለመረሐነ እግል ልግበእቡ እንዴ እንኪ እንሸቁ ህሌት።

ክእነ ለኣብለነ ለህሉ፡ ብዙሕ ምን ጃራብኩ፡ እት ክእነ መሰል ቀድያት እግል ንኣቲ ሰበት ኢለትሐዘናቲ። ሐቲ ዶል ዲቡ ኣቲነ ምንጉብኤ፡ እብ ክሉ ቀልብነ እብ ዐመል እግል ንሸቁ እቲ ለብነ አህዳፍነ ምኑ እግል ለኣጅሌነ ሰበት ቀድር፡ እንዴ ኢንትጌጌ መካይድነ እንዴ አመርነ ምሰል ብዕዳም ለለኣትራክበነ ሰኒ እንዴ ሐፈዝናሁ ተኣሰትህለነ እንዴ ወዴነ ውራቅነ ቀደምትተ ለትካርጀኩ። ለሐልፈ እጅትማዕመ ሐዲሰ የዐለ እቲ፡ ቀደም እትላ ገብኣ እጅትመዕ ላኪን ለወረቀትነ ቀደም። ወለወረቀት ኣሰክ እለ ዲብ ጣውለት ህሌት።



ጅግረ ዐጃላት አቅሊም ምግብ ልተላሌ



ፈደሬሽን ጅግረ ዐጃላት አቅሊም ምግብ እብ መናሰበት ሰነት 2020 ለአዳለዩ ጅግረ ዐጃላት፡ ማሌ ለሀ እት ባካት መድረሱት ጃልዩት (አስመረ) 2ይት መርሐለቱ ዋዲ ዐለ።

መትባድረት 1ይ ዲቪዝዮን እት 117 ኪሎ ሜተር ሪም ለበ ነሳፊት ትጃግረው። እትሊ 1.67 ኪ.ሜ. ሪም ለበለ እለ ክሎሊት እት ለጉበኦ ጅግረ፡ ሐቆ ሄራር 21 ኪሎምትር፡ መትጃግረት ሚካኤል ሃብቱም (ጎሚሰታ) ምን ኤሪቴል፡ ኖቤል ሚካኤል ምን አሰቤኩ፡ መሓሪ ተወልዴ ምን ሰንበል፡ ናትናኤል ተሰፋጽን እብ ብሕቶት፡ ምን መጅሙዐት ለዐባይ እብ ሸፋግ ገጽም ቀደም እንዴ ትፊተው፡ ምን ዱረት እት ዱረት መሳፋቱም አርሐበው።

ኖቤል ሚካኤል ሰበት ወድቀ፡ ምን ሰልፋይት

መጅሙዐት ተርፍ እት ሀለ፡ ውላድ ፈሪቁመ እበ እት ተለ ደውራት ለሳደፊዮም መታክል ምን ትልህዩ ተርፈው።

እግለ ሰልፋይት መጅሙዐት እብ ሸፋግት መርሐው ለዐለው ምን ፈሪቅ አሰቤኩ ላቶም መትጃግረት፡ እግለ መጅሙዐት ዐባይ እንዴ ጸበዋክ መትፊታት ወለ እግለ ውላድ ፈሪቁም መታክይ እት ፍንጌ ትወረጠው።

ጅግረ እግለ ትትመም 10 ዱረት ዶል ተርፈደሀ፡ መትጃግራይ ፈሪቅ ሰምበል መሓሪ ተወልዴ ዐጃለቱ ሰበት ከርበት ምን ትልህዩ ፍግረቱ፡ እት ሚርሐት ለዐለት አወላይት መጅሙዐት ሚካኤል ሀብቱም ወናትናኤል ተሰፋጽን ሌጠ በሐተው። መጅሙዐት ዐባይ ህዩ እብ ሄኖክ ምሉኡበርሃን ወፈሪቅ አሰቤኩ እት ትትዋሉ፡ ጅግረ ሰለሰ ዱረት ክም ተርፈደሀ፡ ሚካኤል ሀብቱም ዐጃለት ሰበት ከርበት እቱ፡ ምስሉ 95 ኪሎምትር ሂሩር ለዐለ ወድ ፈሪቁ ናትናኤል ተሰፋጽን እግለ ልታከዩ ድኢኮን፡ እግለ ልሕደጉ ኢሐረ።

እብለ ለነስኦዩ ከዋወት ህዩ ናትናኤል ምን ብዝሓም

መርፈርጅት ሐምዴ ረክበ። ሚካኤል እምበል ለጉበኦ መታክል ዐጃለት ቀየረ። ሐቆ ክልኤ ደውረት ህዩ እግለ ክልኤቶም መደወን ትዘበጠ እሉም። እት ጋቦን ሰርገል ለረክበ ናትናኤል፡ እሊ ጅግረ እሊ ለፕላተ እግለ ሚካኤል ሃብቱም ናይ ኤሪቴል በክት ሀበ። እብ አሳስ እሊ ሚካኤል ሃብቱም ጅግራሁ እብ 2:40:13 እት ለአተምመ፡ እት ሳዐት 43.8 ኪሎምትር እት ልትፊተት ዲብ ለአተምመ፡ ናትናኤል ደርቡ አተ። ሳልሳይ ህዩ ምን መጅሙዐት ለዐባይ ሐቆ ሐቱ ዱረት ለመልሽ መክሰብ ደበሳይ ዐለ።

መጅሙዐት ዐባይ እት ወዴቱ ብድረ ፕላታ ህዩ፡ ቶማስ ጎይትኦም 4ይ፡ ሮቤል መሓሪ ምን ኤሪቴል፡ ሳሙኤል ምስግና ምን ኤሪቴል፡ አቤል ሮቤል ምን ኤሌክትሮላይት፡ አኽሊሉ ጉበሬሂውት ምን ሰምበል፡ ጴጥሮስ መንግስ ምን ኤሪቴል ወሰሚር ብርሃኑ ምን ጉበለት ህዩ ምን 5ይ አሰክ 10ይ አተው።

መትጃግረት 2ይ ዲቪዝዮን እት ወደወ ናይ 80 ኪሎምትር መሳፈት ጅግረ ዐጃላት ህዩ፡

መትባድረት ፈሪቅ ኤሪቴል ናሆም ገዛኢ ጅግራሁ እብ 1፡ 50:45 አወላይ ለአተምመ እት ሀለ፡ ደርቡ ዳንኤል ይሕደጎ ምን አሰቤኩ፡ ናሆም መንገሻ ምን ሰንበል፡ ዳንኤል በርሄ ምን አሰቤኩ፡ ግርማይ ዮሀንስ ሰምበል፡ ናሆም ዘመንፈሰ-አሰቤኩ፡ አኽሊሉ አረፈ-ኤሪቴል፡ ሳምኤል ተወልዴ ሰምበል፡ ዩኤል ሀብቱአብ እብ ብሕቶቱ፡ አኽሊሉ አተሸም ምን ዲኤች ኤል ምን 2ይ አሰክ 10 ትረተበው።

መትባድረት ዐጃላት አዋልድመ እት 80 ኪሎ ምትር ዲበ ወደያሀ ለትረፎሕ ጅግረ፡ ጅግራህን እብ 2:07:47 ለአተመ እት ህለዩ፡ እት ሳዐት 38 ኪሎምትር ልትፊተት ዐለዩ። ምን ፈሪቅ ጋለነፍሐ ደሴት ኪዳኔ አወላይት እት ትትወወት፡ ወለት ፈሪቅ ብሰራት ጉበሬመስቀል ደርቦ አቱት። ዳናይት ፍጹም-አራግ፡ ሚለና ያፌት ሰራይር ሳወ፡ ሰዛና ፍሰሃዬ ወምናሊዛ አርኦዩ ክልኤተን ምን ፈሪቅ ግብለት፡ ዲያና ዳዊት -ደንደን፡ ብርኽቲ ፍሰሃዬ-አራግ ህዩ ምን 3ይት አሰክ 10ይት ትረተበዩ።

ሚሎቲ ወቺፖሊኒ ቱወወቲው

እት ክል ሰነት ለዲብ ፍንጌ ሐምሰ ገዳይም ፍረቅ መዲነት አክሰመረ ለጉበኦ ጅግረ ኮበሪት እግር፡ እት ሐልፈት ሰንበት ንኢሽ ተአንበተ።

እሰልፍ ለተልሀው ፍረቅ አዱሊስ ወመሎቲ ዐለው። እት ሳብዓይት ደቂቀት ያሲን መ/ብርሃን ዓርደት ለአሸወጠዩ ኮበሪት፡ መትፈርጅት ለሃረሰት ዐለት። ሚሎቲ መትካባት ሰኒ እት ለአርኡ ዲብ 14ይት ደቂቀት እብ መተልሀዮም ሓድሽ ተወልዴ ሚርሐት ለአጽበጠዮም ጎል ረክበው።

ሚርሐቶም ላኪን ሐምሰ ደቂቀትመ ይሐክመት። ሰለሙን ምስግና እግለ አዱሊስ ለልዓድሎም ጎል ሰጀለ እሉም።

ሐቆ ዕርፍ ጎል እንዴ አሰጅሎ ዝያድ 80 ደቂቀት ከልአው፡ ሐቆህ እብ ያሲን መሐመድ ብርሃን ጎል ሰበት ደግመው፡ ሚሎቲ እግለ አዱሊስ 2-1 ቀልበው።

ሐቆህም ሚዳን ለትክረው ፍረቅ አልታሕሪር ወቺፖሊኒ ቶም። ትልህዩ ሰኔት ፍንጌ ክልኤቱ ፍረቅ ትረኤት። እት 15ይት ደቂቅ ቺፖሊኒ ደርበት ጀዘ ረክበው፡ ሙሴ ብርሃኔ ምን መሳፈት 22 ምትር እንዴ ሾተዩ ህዩ ሰጀለዩ።

አልታሕሪር እግለ ለዐሬ ጀርቤታት ብዙሕ ወደ። እት 22 ደቂቅ ህዩ አፍያት ቺፖሊኒ እንዴ ሃጀመው ጅንዩ ዲንሰ ለልትሐመድ ጎል ሰጀለ።



እግለ ዕርፍ ህዩ 1-1 ፈግረው።

ሐቆ ዕርፍ እት ተለ ወክድ ትልህዩ፡ ፈሪቅ አዱሊስ ምን አፍያቱ ገጹ ቀደም

እት ጌልል፡ ኮበሪት እት ምግብ ሚዳን እግለ ልራቅብ ወልትከባበት አንበተ።

እት 37 ወ38 ደቂቅ ደርብ ሕድ

ቴድሮስ ዐለምጾ እበ ረክበዮም እሉም አግዋል ህዩ፡ ለትልህዩ እብ ዐውቱ አልተሕሪር 3-1 ተመት።

አትሌቲክስ እት አቅሊም ዐንሰበ

እት አቅሊም ዐንሰበ፡ አአትሌቲክስ ምን ወክድ እት ወክድ ዲብ ለሐሰሶ መጽእ ምንመ ሀለ፡ መትከምካም አትሌታት ዲብ ፍረቅ፡ ክምስልሁመ ኢረኪብ ምደርቢን ምን አግደ መሐሰኪት ርያደትለ አቅሊም ጋብእ ክም ሀለ ልትሀደግ።

ቀደም እለ እት አቅሊም



ዐንሰበ ብዝሓም አትሌታት ክም ፈረው ለሸርሐ ርኢስ ፈደሬሽን አትሌቲክስ አቅሊም ዐንሰበ መምህር ተሰፋሚካኤል አብረሃ፡ እትሊ ሐን አዜ ላኪን ክምለ ለአትሐዜ ሰበት ኢትሸቀ ዲቡ፡ ክመ ለአትሐዜ ልሄርር ክም ኢጸንሐ ወደሐ።

አዜ ላኪን ሰኒ ቡጉስ ክም ሀለ

ወምን ናይ መሻረከት መርሐለት እት ናይ ጅግረ ዕዱያም ክም ህለው፡ እሊ ህዩ ፈድላ አትሌታት ወሐል እድውርት ለህሌት ልጅነት ፈደሬሽን አትሌቲክስ ክም ቱ አፍሀመ።

ብጉስ ለሀለ ወራታት እብ ሕድድት መቅደረት ልትባገስ ክም ሀለ፡ ምናተ መትከምካም

አትሌታት፡ ናይ ዕንዳቂሆም አላት ትካመለ ምን ጉበኦ፡ ክምስልሁመ ምደርቢን ትወጀደው ምን ጉበኦ ላኪን፡ እብ ደረጃት ወጠን ሰእየት ለትጉበኦ እቶም አትሌታት እግለ ልትረበው ክም ቀድሮ ሸርሐ።

መስኦል ቴክኒክ ፈደሬሽን አትሌቲክስ አቅሊም ዐንሰበ አሰይድ ጎይትኦም ብርሃኔ እብ ተረቱ፡ ምስለ ሐልፈ እት ልትርኤ፡ ለሐሰው አትሌታት እብሁዛም ክም ህለው እት ለአክድ፡ ምን አቅሊም እንዴ ሐልፈው ደውለት እግለ ለአሰሙ ለቀድሮ መትጃግረት እግለ ሚመዮትመ ለልአተቅድር ወክድ እቱ ባጽሓም ክም ህለው እት ለአፍሀም፡ እሉም አትሌታት


እግለ ልዕበው ጅህድ ኩሎም ለክሰሶም ጀሃት ክም ለአትሐዜ ሐበረ።

እት ናይ ብሕቶት ጅግራታት ዲብ ሻርክ ምን ወክድ እት ወክድ ዲብ ልትጠወር መጽእ ለሀለ ሻብ ዐብደልረዛቅ ሰሌማን፡ እት ዲብ ባርንቶም እት ሐልፈ ወሬሕ ለጉበኦ ጅግራታት ቅዋት ድፈዕ ካልኣይት እንዴ ጉበኦ ክም ተወወተ፡ ሰዐይ ህዩ እብ ካድም ሕበር አትሌታት ወሰብ ምህነት ለልትጠወር መጽል ርያደት ፍቲት ክም ቱ ሸርሐ። እትለ ሰነት ለትክሰሰ ጀሀት እግለ ትከምክምም ወናዲ እግለ ቲዴ እሉም እብ ሰእየት ልትጸበር ክም ህለውመ አተንበህ።

ተሰፋሚካኤል ጉበሬስ



እብ ሰበት ሻላንታይን ደይ ሚ ተምኒሮ?



ሻላንታይን ደይ Saint Valentine's Day በህለት ቅዱስ ሻላንቲኖ ዲብ እለ ለተሀደገት አምዕል ሰሜቱ እንዴ ከትብ እግለ ፈትዮ ካርተሊነ ለነድእ እተ አምዕልተ። እለ አምዕል እለ አምዕል ፍቲ አው ቅዱስ ሻላንታይን ትትብህል። እለ አምዕል እለ እት ክል ዮም 14 ፊብርዋሪ ለትዘከር እት ገብእ። አሳስ ክምሰል ናይ

ድወል ምውዳቅ ጸሓይ (አርብ) አምዕል ፊብት ክስታን ተ እንዴ ገብእት እብ ምሮ አው ክልኦት ሹሀደ ክስታን ትዘከር። እብሊ እለ አምዕል እለ ክምሰል ናይ ደያነት። ዓዳት ወዘክረት ናይ ሮማንዩን ክምሰልሁም ዲብ ብዙሕ ድዋራት ዐለም ለትዘከር ተ። ናይ እስትሽሃድ ታሪክ ምስሉ ለትጸበጠት እት ገብእ እት ክል ዮም 14 ፊብርዋሪ ህዩ ትዘከር። ክምሰሁም ዲብ ሐብስ እግለ ልትዐዘቦ ቅዱሳም እንዴ ትብህለት ዲብ ሐንቴ እ ም ብ ራ ጦር ዮ ት ሮም ትዘከር ለዐለት አምዕል ተ። እለ አምዕል እለ እትሊ ለህሊነ እቱ ወክድ። አምዕል ሻም አው ፍቲ እንዴ ትብህለት እትሊ ሳልሳይ ክፈል ዘመን ትዘከር ህሊት። እብ አሳስሊ ናይ ባዲር ዓዳት። ቅዱስ ሻላንታይን እግለ ዲብ ሐብስ ለዐለት ሕጽብት እንዴ ትዋሰራት እሉ ትትረኣዩ ዲብ ህሊት። ዲብ 18 ክፈል ዘመን አስክ እለ ወለትለ ሕብስት ላተ



መጥብዮት



- እት እዲነ አስክ እለ እሙራም ለህለው መጥብዮት 4200 ጅንሰ ሔዋን ባጽሓም ህለው።
- መጥብዮት ደሞም ሕፋን ሔዋናት ልትብህሉ። እሊ በህለት ህዩ ሐዋሪን ናይለ እቱ ነብሮ ለህለው ምድር ምንመ ትትቀየር። ሐፋነት ገሮቦም ኩሉ ረኣሱ ኢትትቀየር።
- መጥብዮት እግለ ወሉዱ ውላድ ምነ ዶል ውልደቱ ለልአጠቡ ሔዋናት ቶም።
- ምን ኩሎም መጥብዮት እግለ ትንፈር ለትቀድር በዐል ደነብር ዕዝሎ ሌግ ተ። ዕዝሎ ሰፊረት እት እንተ፡ ቤጪት ኢትወልድ። ክምሰህ ዕዝሎታይ ንኡሽ ትወልድ ወትአጠቤ ሰበት ገብእት ህዩ። ምስል መጥብዮት ለትትዐለብ ሰፊረት ህተ ሌጣ ህሊት።
- ዕዝሎ አውመ ዕውር ላሊ። ምን 20 አስክ 30 ሰነት ዕምር በ። አክሉ ሰበት ትጸኔሕ። ምነ ነኣይሽ ሰራይር ምስል ንኡሽ ነፊሰተ ለፊመ ዕምር ለትጸኔሕ ክም ተ እሙር ህሊ።
- ሰካድ ዘራፍ ረዩም ተ። ክል ወክድ ህዩ ምስል ዕምረ እት ወስክ ክም ገይሰ ልትአመር። አክ'ለ ዐበት ተ። ስጋዳመ ሪም እት ወስክ ገይሰ በህለት ተ።
- አጅኒት (ውላድ) ዓሰ ኔብራይ ወዶልፊን። ምነ ዶል ለእለ ትወለደው። አስክመ ወሬሕ ለአተሞ፡ ኩሉ ረኣሱ ኢሰክቦ።

ቻርሊ ቻፕሊን ምንቱ?

ቻርሊ ቻፕሊን ኦሮ ምነ ሸህረት ብዝሕት ለረክበው ሙመሰሊን ግርቦት 20 ክፈል ዘመን ተ። ህቱ ምሮ ምነ ብሐዳም እት ዘመንለ እምበል ክርን ልትሸቀ ተማሲል ለመሰለ ወአስክ እለ ለኢልትመሸግ ተ።

ቻርሊስ ስፔንሰር ቻፕሊን ዝያደት ሸህረት ለረክበ እበ “ቻርሊ ቻፕሊን” ለለሸዕልል ዕቢዮት ንኡሽ ዐቢቲ። አቡህ ህቱ ወድ 12 ሰነት እት እንቱ እብ ሰቡብ ደረር ክምረት ሞተ። እሙመ እብ ሕማም ዐቅል ትትዐዘብ ሐቅለ ጸንሐት። ቻርሊስ ምን እሊ ወክድ እሊ እንዴ አስተብደ እብ አርወሐቱ እግል ልትናበር አምቡተ።

ለአወላይ ወቀዩ ህዩ እት መሰረሕ እንዴ ዐርገ እግል ልመሰል ወምመሰል ሰኒ እግል ልግበእ እት ሳምናይት ሰነት ምን ዕምሩ ነፊር ፍርቀት ሙመሰሊን ገብኡ። ህቱ እት ተምሲል እትለ ትወቀለ እቱ ወክድ አስክ አምሪክ ሳፈረ ወሰኒ እግል ልመሰል አስተብደ። እለ መቅደራቱ ወመውህቡ ህዩ እግል ዝያደ 75 ሰነት እንዴ ኢልትመሸግ አተላለ።

ገሌ ምን ሐቃይቅ ቻርሊስ፦

1. ቻርሊ ቻፕሊን እት 16 ኣፕሪል 1889 እት ዎልዎርዝ ሎንደን ብሪጣንዩ ቀዳማይ አዶልፍ ሂትለር እብ አርበዕ ዮም ትወለደ።
2. ህቱ ለወአላይ ሙመሰል እትለ ናይለ ወቀት ለህይ መጋዚን ለዘሀራ ተ።
3. ቻርሊስ አርበዕ ዶል ህደ
4. ቻርሊስ ሐቱ ዶል ሳልሳይት ጃእዘት ነስኦ
5. ክምሰል አዶልፍ ሂትለር እንዴ ገብኦ እት ግሬድ ዲክታቶር መሰለ
6. ጃእዘት አስካር እት

ፊሊም “ሌምላይት” እተ ሔሰት መሰቀት ነስኦ።

7. ናይለ ሸቀዩ አፍላም ሞሳት እብ ዶልዶሉ እት ሆሊዉድ እት እንቱ ምኑ በደ አው ትሰረቀ።

8. ገርቡመ ሐቅ ሞቱ እንዴ ትሰረቀ ህቱ እግል ለአቅብል ምን ዓይለቱ ማል ብዙሕ ደፊዐ። ግናዘቱ ሐቅ 11 ሳምን እብ ሴርቀት አቅብር እንዴ ተሐንፈለት ትሰረቀት። ለሴርቀት ክምሰል ትጸበጠው ተ ለትረከበት። ሐቅ እሊ ቻርሊስ እት ሐንቴ 6 ፊት እት ሐንቴ እብ እስምንቲ ለትሸቀ ኮንክሪት ትቀበረ እሊ ህዩ ምን ብዕዳም ሴርቀት እግል ልትነጃ እንዴ ትብህላ ተ።

9. ቻርሊ ቻፕሊን አምሪክ ነብር ወዲበ እት ሰነት 1953 እት ሐብስ ምንመ ዐለ ክሉ ረኣሰኡ ጅንሰዮት አምሪክ እግል ኢትትህዩቡ ራፍድ ዐለ። ህቱ ዲብ ሰዊዘርላንድ እተ ነብር እቱ ለዐለ ናይ ሐብስ ሰኒን እት እንቱቱ እት ሰክብ እት ዲሰምበር 25 1977 እት 88 ሰነት ምን ዕምሩ ሞተ።



ዝያድ 10 ፍንቲት ርኩብ

